

REVELESEN

O 65 kirismas to oah ee, vasuksuk in a peah hah pe Ieesu' manuh pa vöön va kin, ke Jon kiun o kiun va'ih. A tääm ne' to kinkiun non o kiun vëh, o te' varih to vavattet ne e Ieesu' nee to vakmis raeo ko vöknah ee pee. E Jon to iu non raeo se sun vakis ne po vaman, me pa vatet e Ieesu', ivëh, ke' kiun o kiun va'ih. Manih pa kiu pe Ieesu', e Sosoenën se komtön en po te' to vakihat me ne poë, me e susun po ora' hat. Ko nok vavih en po te' varih to vavattet ne poë, pare hikta këh poë. E' a tah ne Jon to kiun suk po kiun va'ih.

A Soe Ne Kristo To He' E Jon

1 ¹A soe vëh ne Sosoenën to he' voh e Ieesu' Kristo, ke' he' pet a te' kikiu pe' e Jon pa vataare poan a ma tah se tavus oho' ee. E Sosoenën to vanö ma' a ankerö' pe' manih pa te' kikiu vëh e Jon, pan e' se vataare pet a ma meh te' kikiu pe'. ²E Jon to soe tavus en pa ma soe ne' to tēnan, me a tah ne' to ep voh en. E' a ma soe poë varih to tane' ma' manuh pe Sosoenën, me a ma soe to vatvus vateera' ne e Ieesu' Kristo. ³Vaeö rakah po te' varih to ëhëh ne, ko vavattet ne a soe vanënën pe Sosoenën to kiun non manih po Puk pe'. Suk ataeah, o poen to öök vatët en no a ma tah poë varih se tanok.

E Jon To Kiun Ke A Ma Napan

⁴Eö' e Jon to kiun nös o kiun vëh manih peöm, o tönim me o pöök kum te' varih to vaman nem e Ieesu', ko te' nem manih pa muhin va Esia'. E Sosoenën to te' tamoaan voh e non, me kuru, me e' se hah en ma', e' se he' a neöm o ururuan me a taate' moomo. A tönim me a poa tuvuh varih to te'te' ne sih pa matan a ö iho' pa te' sunön e Sosoenën, ee me se he' a neöm o ururuan me a taate' moomo. ⁵Me e Ieesu' Kristo a te' to vatvus vatotoopin a soe pe Sosoenën, se he' a neöm o ururuan me a taate' moomo. E' to sun vovoh hah ke voh a nap mët, pare' te' e non e Sunön po te' susunön kurus varih po oeh. Ka manih po ururuan pe' e' to mët, pare' hehe a ra po era' pe'. ⁶Ivëh, ke' vate' a ra, ka tavus o vute' va po te' ësës he' pe Sosoenën e Tamaneah. Aiah! Ka pët kë a ëhnan e Ieesu' Kristo, ke' se te' tamoaan non, e' e Apuh, ko öt non o kikis va pa matop tamoaan in a ma moeh tah kurus. Oman.

⁷Ep öm! E' se nö va'peh me ma' a unöh, ka napan kurus se pët ep in poë. Me o te' varih to ruk voh poë. A napan kurus varih po oeh se ep in poë, ee se vaokook. Suk ataeah, ee to hinën voh poë po poen ne' to te' voh non manih po oeh. A ma tah poë varih se tavus vamaman rakah ee. Oman.

⁸E Sunön Sosoenën to soe pan, “Eö' a Taneo, me eo' a Vahik. Eö' e vatamoaan, eö' to te' e no' kuru, me eö' se hah eo' ma'. Eö' e Sosoenën A Kikis Vi.”

E Jon To Ep E Kristo

⁹Eö' e Jon, e kea rakah peöm to te' va'peh me voh a neöm pa ma kamis, parö' te' me no' a taate' anoeh va pa sun vakis, ea se te' no a ma te' pe Ieesu'. Ko te' hop no pa Matop Vih pe Sosoenën. Eö' to vavatvus voh no' a soe pe Sosoenën, me o vaman peö' manih pe Ieesu'. Ivëh, kee vanö voh a neo' manuh pa to va Patmös. ¹⁰Ka manih po poen vamomoaan in o nënkikiu e' o poen pe Apuh, a Tuvuh Vasio' to nö ma' manih peö', kö' tēnan a soe apuh to tanih va non manih pa suvin manih pa tonuneo'. ¹¹E' to soe vamanih pan, “Kiun töön ah, a ma tah kurus nēn se ep, parēn vanö manuh pa tönim me o pöök kum te' varih to vaman ne e Ieesu' manih pa ma vöön varih, Ēfēsus, Smerna', Pergamum, Taëataëra', Sardis, Filadëlfia', me Laodisia'.”

¹²Ivëh, kö' tarih eo' to ep in a te' vëh to vavaato me a no neo'. Eö' to ep in o tönim me o pöök ram ne to nok voh pa gol to sun ne. ¹³Parö' ep in a pah te' to sun non topnin a ma ram poë varih. E' to matan va non manih pe Koa' Te' Pa Napan Kurus to ohop non o ohop rë to kopös e non pa sionineah, pare' voh non o voh manih pa poeneah, nee to nok voh pa gol. ¹⁴A uvin me a pasuneah to para' kakaare va non manih pa uvin a sipsip, ka mataneah to ëman va non manih po tēkrea in a sura'. ¹⁵A poa moneah to totona' va ne manih pa bras, nee to nan po sura'. Parö' tēnan o vaato pe' to kukuruh va non manih po totruen. ¹⁶E' to öt non a tönim me ra poa vesun manih pa papmatö pe', ko rapis rë kakakni vapon to tane' ma' pa rivoneah, ka mataneah ëman va non manih pa ö no a potan kikis to ëman va non.

¹⁷Eö' to ep in eah, ko vu' eo' pa havin moneah, vamanih pa te' a mët. Ivëhkëk, e' to öt a neö' pa papmatö pe', pare' soe pan, “Koe a naöp! Eö' a Taneo me eo' a Vahik. ¹⁸Eö' a te' to'to'! Moaan voh eö' to mët, ivëhkëk, eö' to te' to'to' tamoaan e no'. Parö' öt no' o kikis va pa he' o to'to' manih pa nap mët. ¹⁹Ivëh, kën se kiun töön a ma tah nēn to ep in, me a ma te' varih kuru, me a ma te' se tavus amot ma'. ²⁰Eën to ep voh nom a tönim me ra poa vesun to te' ne pa papmatö peö', me o tönim me ro pöök ram nee to nok pa gol. E' a soe vapipino' pamëh ivëh, a tönim me ra poa vesun to vëknöm i ne a ma ankerö' varih to matop ne o tönim me ro

pöök kum te' varih to vaman ne e Ieesu'. Ko tönim me ro pöök ram gol to vëknöm i ne o tönim me ro pöök kum te' varih to vaman ne e Ieesu'.

O Kiun To Nö Non Pa Napan Va Ēfësus

- 2** ¹Ka te' to'to' soe ka neo' pan, eën se kiun na a soe to soe non pan, "Manuh pa ankero' to matop non a napan va po vaman to te' ne pa vöön va Ēfësus, eën se kiun, parën soe ke na eah a ma soe varih, 'A te' to öt non sih a tönim me ra poa vesun manih pa papmatö pe', pare' te' non topnin a ma ram gol poë varih, e' to vanö nös a soe manih peöm, pare' soe vamanih pan,' ²"Eö' to nat e no' pa ma tah nöm to nok voh pa ma kiu vëhva' peöm, me a ö nöm to sun vakis nem pa taate' tö nöm to te' me voh nem. Eö' to nat e no', peöm to rës e nem pa ma te' nonok vahat, paröm punö' voh em pa ma napan varih to sosoe ne pan, e'e o aposol, ivëhkëk, ahik, e'e a ma nap pikpiuk. ³A napan to ep ka ne neöm to vavatet a no neo', pare punö' e ne pa mirö' a neöm, ivëhkëk, eöm to sun vakis voh e nem pa taate' tö paröm te' a ma vu punis poë varih.
- ⁴Ivëhkëk, eö' te' me no' a soe se ruk a neöm to soe va non manih pan, moaan voh pa ö nöm to vaman momoaan, eöm to iu rakah voh e nem peö', ivëhkëk, kuru vëh, ahik. ⁵Moaan voh, eöm to nonok voh nem a taate' vih, paröm koe em. Ivëh, köm se kokoman hah na, paröm vatet a taate' vih vëh nöm to te' moaan voh nem, paröm koe a taate' hat nöm to te' me nem kuru. Eöm se keh hikta panih a taate' hat peöm, eö' se kon hah këh eo' peöm po ram gol peöm. ⁶Ivëhkëk, a pah taate' vih vëh nöm to te' avoe' me e nem. Eöm to rës e nem pa ma taate' no a napan pe Nikolas to nonok ne.^a Eö' me to rës rakah e no'.
- ⁷Ivëh, keteh to te' me non a tenaneah, e' se pënton a soe pa Tuvuh Vasio' manih po kum te' varih to vaman e Ieesu'. Ka te' se keh öt vakis non o vaman ko onoah po vapus va pa taate' hat, eö' se he' a soe vaonöt pa eën o voa' naon va po to'to' tamoaan vëh to te' non pa Vöön va Kin pa rak pe Sosenën."

A Soe To Nö Non Pa Napan Va Smerna'.

- ⁸"Manuh pa ankero' to matop non a napan va po vaman to te' ne pa vöön va Smerna', eën se kiun a soe to te' va non manih pan, 'E' va'ih a soe to tane' ma' pa te' va pa Taneo me a Vahik. E' to mët voh en, ivëhkëk, kuru vëh e' to te' to'to' e non, pare' vanö nös a

^a 2.6 [... a napan pe Nikolas ...] Ee o kum te' varih no o vaman me o kokoman pee to hikta te' man ne. Ee to vavaasis ne pan, a taate' rëhrëh to hikta mirö' non o vaman pea manih pe Kristo. Me a ma meh kokoman pee to hikta te' totoopin ne.

soe manih peöm, to soe va non manih pan', ⁹“Eö' to nat e no' pa punis nöm to te' nem, paröm te' e nem o te' arus. Ivëhkëk, eöm to te' va e nem manih po te' öt ö va pa vöön va kin. Eö' to nat e no' pa ma soe vavovoeak, no a napan to nonok ne manih peöm, o te' varih to sosoe ne pan, ee ro Jiu'. Ivëhkëk, ahik, ee a ma napan pe susun po ora' hat. ¹⁰E' hikta se te' varë non, köm te' em pa punis, ivëhkëk, eöm se koe a naöp. E susun po ora' hat se vaho a ma meh peöm manuh pa nohnoh, pa punö' o vaman peöm, ko hinën ka neöm po komön o havun poen. Ivëhkëk, eöm, se ötöön vakis o vaman peöm, ke' antoen non a ö söm mët, ke eö' se he' a neöm o to'to' vamanih po voen peöm.

¹¹ Ivëh, keteh to te' me non a tenaneah, e' se pënton a soe pa Tuvuh Vasio' manih po kum te' varih to vaman e Ieesu'. Ka ma te' varih se keh onoah o vapus, ee hikta se nanaöp e ne a vapöök mët. Ahik rakah!”

A Soe To Nö Non Manuh Pa Napan Va Pergamum

¹² “Manuh pa ankerö' to matop non a napan va po vaman to te' ne pa vöön va Pergamum, eën se kiun a soe to te' va non manih pan,

'A soe vëh to tane' ma' pa te' vëh to te' me non o rapis rë kakakni vapon. E' to vanö nös a soe manih peöm, pare' soe vamanih pan,' ¹³“Eö' to ep e no' pa ö nöm to te' nem, e susun po ora' hat to te' non pa ö pamëh. Moaan voh e Antipas, a te' he'he' soe peö' to vavetet rakah voh non a soe peö', kee ip vamët voh poë topnineöm Ivëhkëk, eöm to öt vakis avoe' voh e nem po vaman peöm manih peö', paröm hikta he' tonun voh in o vaman peöm. Ahik. ¹⁴Ivëhkëk, eö' to te' me no' a soe se ruk a neöm. E' to te' me non a ma te' to te' ne topnineöm manih Pergamum to vavetet vakis ne a taate' pe Balam. Moaan voh e Balam to vavaasis voh e Barak pa taate' vamanman a napan va Israëel. Kee nö pa taate' hat, pa ö nee to ënëen voh ne a ma taëen no upöm te' to he'he' ne ro sosoenën vapikpiuk. Pare te' voh ne pa taate' rëhrëh. ¹⁵Ke' te' va kov e non manih pa ma paeh te' to te' me e ne peöm. Ee to vavetet vakis ne o vavaasis pa napan pe Nikolas. O vavaasis pamëh to te' vatoe me e non po vavaasis pe Balam. ¹⁶Ivëh, köm se panih a taate' hat peöm. E' se keh hik non, eö' se nö ma' parö' vapus me a ma napan poë varih po rapis rë vëh to te' non pa rivoneo'.

¹⁷ Ivëh, keteh to te' me non a tenaneah, e' se pënton a soe pa Tuvuh Vasio' manih po kum te' varih to vaman e Ieesu'. A ma te' se keh onoah o vapus, eö' se he'he' pa paeh raoe a taëen to vakooan no ma' manuh kin, parö' he'he' papaeh raoe a ma vös kakaare. Manih pa ma vös poë varih, eö' se kiun o ëhnan voon ne e tövaneah varoe pa vös pamëh to nat non.”

A Soe To Nö Non Manuh Pa Napan Va Taëataëra'.

- ¹⁸“Manuh pa ankerö' to vovoh ke non a napan va po vaman to te' ne manih pa vöön Taëataëra', eën se kiun a soe to te' va non manih pan, 'A soe vëh to tane' ma' pe Koa' pe Sosenën, a mataneah to ëman va non manih pa sura', ka moneah to totona' va non manih pa pras, nee to hë ke' voon rakah en. E' to vanö nös a soe vëh manih peöm, pare' soe vamanih pan,' ¹⁹“Eö' to nat e no' pa tah nöm to nonok nem, me o iu peöm manih pa napan, me o vaman peöm manih peö' me a kiu va'aus peöm manih po upöm te'. Eö' to nat e no' peöm to sun vakis e nem pa te' a ma punis, me a taate' vih nöm to nonok voh nem. Ka kuru vëh nöm to pah nonok vavih oah pet nö e nem.
- ²⁰ Ivëhkëk, eö' to te' me no' a soe se ruk a neöm. Eöm to kamö' me voh em pe köövo vëh e Jësëbël. E' to eö' non sih pan, e' a te' vanënën soe pe Sosenën. Pare' vavaasis non sih pa rëh ke a ma te' kikiu peö' pa taate' rëhrëh, me a ëën a ma taëën no upöm te' to he'he' ne ro sosenën vapikpiuk. ²¹ Eö' to he' voh eo' pe' pa tëëm, pan e' se panih a taate' te'te'vaasi' pe'. Ivëhkëk, e' to koe en. ²² Ivëh, keö' se he' rakah eo' pe' po kamis o pöh apuh ne' se kon, va'peh me a ma te' varih ne' to te'te'vaasi' me non, pa ö no a ma te' poë varih se keh hikta panih a ma taate' hat pee. ²³ Eö' se ip me eo' pa ma koa' pe' varih to vavatet ne poë, ka napan po kum te' varih to vaman ne e Sosenën se nat vamanih pan, eö' to kiiki vavih no' o kokoman pa ma napan kurus. Eö' se voen papaeh ro va ka neöm manih pa ma taate' nöm to nok voh.
- ²⁴ Ivëhkëk, eö' to soe ka neöm a napan to te' nem Taëataëra' to hikta vavatet voh nem o vavaasis pe köövo, ko hikta nat nem pa taate' pamëh, ko hikta te' hop nem pa taate' vëh nee to popoka' ne pan, 'A ma vaato vakoan pe susun po ora' hat.' Eö' to soe ka neöm pan, eö' hikta se he' punis hah a no neöm. ²⁵ Ka ma tah nöm to öt nem, eöm se öt vakis nem, ke' antoen non o poen nö' se hah ma'.
- ²⁶ Eöm se keh onoah o vapus paröm vavatet nem a taate' peö', ke' öök pa ö ne eöm se mët, eö' se he' a neöm a tasun pa matop a ma napan kurus.
- ²⁷ Eöm se öt nem a tasun ko matop vakis nem raeo, paröm tös momoe raeo kee tatamoe vasosone' vamanih pa nöh.
- Sng 2:9*
- ²⁸ A tasun vëh no' se he' a neöm, e' se vatoe va non manih pa tasun vëh ne Tamön to he' voh a neo' pa matop a ma napan. Eö' se he' a neöm a vesun vëh a tovia'.
- ²⁹ Ivëh, keteh to te' me non a tenaneah, e' se pënton a soe pa Tuvuh Vasio' manih po kum te' varih to vaman e Ieesu'.”

O Kiun To Nö Non Pa Napan Va Sardis

3 ¹“Manuh pa ankerö' to matop non a napan va po vaman to te' ne pa vöön va Sardis, eën se kiun a soe to te' va non manih pan, 'A soe vëh to tane' ma' pa Te' to te' me non a tasun pa matop a tönim me ra poa tuvuh pe Sosoenën, me e' to öt a tönim me ra poa vesun. E' to vanö nös a soe manih peöm, pare' soe vamanih pan,'

“Eö' to nat e no' pa tah nöm to nonok nem, parö' nat pet e no' pan, eöm to te' to'to' e nem manih po sionin, ivëhpëhkëk, eöm to te' va nem manih po te' to mët voh ee. ²Ivëh, köm se koe a koroh. A taate' vih peöm to te' avoe' e non to me' e non pa ro. Suk ataeah, manih pa ma taate' nöm to nonok voh nem, eö' to ep no' pan, a ma taate' poë varih to me' avoe' e ne pa totoopin manih pa matan e Sosoenën peö'. ³Nat e nem po vavaasis va pa soe vih, nöm to tēnan voh em, eöm se kon hah. Eöm se panih a ma taate' hat peöm. Eöm se keh hikta sun këh a koroh, eö' se nö va ma' manih pa te' kakaveo, köm hikta se nat nem po poen poanheh nö' se nö ma' manih peöm.

⁴Ivëhkëk, a ma pöh te' va peöm to te' ne Sardis, no a ma ohop pee to te' voon e ne. O te' varih to ohop ne a ma ohop kakavo', ee varoe to antoen ne a nö va'peh me a neo'. ⁵A te' se keh onoah o vapus, a, eö' se ohop eah po vu ohop pamëh, parö' hikta se hiuk no' a ëhnaneah manih po puk va po to'to' tamoan. Eö' se vatvus a ëhnaneah manuh pe Tamön, me manuh po ankerö'.

⁶Ivëh, keteh to te' me non a tenaneah, e' se pēnton a soe pa Tuvuh Vasio' manih po kum te' varih to vaman e Ieesu'.”

O Kiun To Nö Non Pa Napan Va Filadëlfia'

⁷“Manuh pa ankerö' to matop non a napan va po vaman to te' ne pa vöön va Filadëlfia', eën se kiun a soe to te' va non manih pan, 'A Te' a vivihan rakah, me e' a pusun in a taate' man rakah, pare' öt non a ki' pe Devit.^b E' se keh peret o hopa', a hikta te' se panih hah. E' se keh panih o hopa' a hikta te' se peret hah. E' to vanö nös a soe manih peöm, ko soe vamanih pan,'

⁸“Eö' to nat e no' pa taate' nöm to nonok nem sih, ko nat e no' po kikis peöm to hikta te' eh vi non, ivëhkëk, eöm to vavatet pet voh e nem po vavaasis peö', ko vavatet voh e nem peö'. Eö' to peret voh keö' peöm po hopa', ka hikta te' to onöt non a papanih, paröm hikta naöp voh nem a vatvus a ëhnaneö'. ⁹Eöm to nat e

^b 3.7 [... pare' öt non a ki' pe Devit.] A te' to öt non a ki' pe Devit, e' e Ieesu'. A ki', e' o vëknöm va pa te' to te' me non a tasun pa te' sunön.

nem pa napan varih, ee a ma napan pe susun po ora' hat, ee to soe pan, 'Emöm ro Jiu!', ivëhkëk, ahik. Ee hikta te' ne pan, ee ro Jiu', ee a nap pikpiuk, eöm se nat nem, ee se nö ma' ko vatokon manih pa havineöm, pare nat vamanih pan, eö' to iu e no' peöm. ¹⁰Suk ataeah, eöm to vavatet voh nem a soe peö', paröm sun vakis voh e nem pa te' a ma punis varih to tatavus voh a no neöm. Ivëh, ke eö' se matop e no' peöm, ka punis vëh^c se tavus a ma napan varih po oeh, me eöm. ¹¹Eö' se nö vëhö' eö' ma' manih peöm. A tah nöm to öt nem, eöm se öt vakis nem, tome' a meh te' he këh a neöm o voen peöm

- ¹² A te' se keh onoah o vapus, eö' se vate' va in eah manih po toon in a iuun vasio' pe Sosenën peö'. Ke' hikta se tavus hah këh non a iuun pamëh. Manih pe' nö' se kiun a ëhnan e Sosenën peö', me a ëhnan Jerusalëm Voon to tane' ma' manuh pa vöön va kin, me a ëhnan voon peö'.
- ¹³ Ivëh, keteh to te' me non a tenaneah, e' se pënton a soe pa Tuvuh Vasio' manih po kum te' varih to vaman e Ieesu!''

O Kiun To Nö Non Pa Napan Va Laodisia'

¹⁴ "Manuh pa ankerö' to matop non a napan va po vaman to te' ne pa vöön va Laodisia', eën se kiun a soe to te' va non manih pan, 'A te' to vapusun i non a taate' man, pare' vavatvus vatotoopin non a soe pe Sosenën. E' a pusun in a ma tah kurus ne Sosenën to nok voh. E' to vanö nös a soe manih peöm, ko soe vamanih pan,'

- ¹⁵ "A ma taate' nöm to nonok nem, nö' to nat e no', köm to hikta te' kuniu' nem, paröm hikta te' hiva' nem. Eö' to iu no' a ö söm te' kuniu' nem, ke', te' hiva' nem. ¹⁶Ivëhkëk, eöm o himonmoen, ivëh, keö' se kavuh vi eo' peöm. ¹⁷Eöm to sosoe nem pan, 'Emöm a ma te' ötöt ö rakah, to öt nem a ma moeh tah, pamöm hikta kökööt i nem ta pah tah.' Ivëhkëk, eöm hikta nat va nem manih peöm o vausean, paröm vatamak, paröm arus, paröm kekeho', ko pehpeah. ¹⁸Ivëh, kö' he' a neöm o kokoman vëh, eöm se voen tane' a gol a hikto kusan manih peö', köm se te' nem a ma te' ötöt ö rakah. Eöm se voen me o ohop kakaare ko kupkup a ma sionin pehpeah peöm, köm hikta se poet nem a napan. Eöm se voen me o marasin ko vaho' pa ma matëeneöm köm se ep vavih. ¹⁹Eö' se keh iu no' a ma te', eö' se sirö' rae, me he' punis rae, kee vatotoopin a ma taate' pee. Ivëh, köm se kokoman vavih, paröm panih a ma taate' hat peöm.

^c 3.10 [... ka punis vëh ...] A pusun in a punis vëh se tavus manih pee to te' va non manih, e' se vaeh rae, kee sun vakis po vaman pee.

- ²⁰ Pënton öm, eö' ivëh to sun no' po matön hopa' ko tekteok no' nös. Ta pah te' se keh tënan a vaoe peö', pare' peret ma', eö' se ho ko vakum me eah, ke möm vaëen va'peh. ²¹A te' se keh onoah o vapus va pa ma taate' hat, eö' se vaonöt keah, ke' iho' va'peh me a neo' pa ö ihiho' pa te' sunön, pa matop in a ma tah kurus vamanih pa ö nö' to onoah va in o vapus va pa hat, ke Tamön vaonöt ka neo' pa iho' va'peh me eah pa ö ihiho' pa te' sunön.
- ²² Ivëh, keteh to te' me non a tenaneah, e' se pënton a soe pa Tuvuh Vasio' manih po kum te' varih to vaman ne e Ieesu'."

A Napan To Hinhin Ne E Sosoenën Manuh Pa Vöön Va Kin

4 ¹O tata to hik en, kö' ep pet in o hopa' vöh va pa vöön va kin to taperet en. Ka soe nö' to tënan moaan voh to tane' ma' kin to te' va non manih pa ö no a suvin se tanih ava, ka soe to soe no ma' pan, "Peah mah manih, kö' se vataare a oah a ma tah se tavus amöt ma'." ²Varu' va ko manih no a Tuvuh Vasio' to puh en manih peö', ka manuh pa vöön va kin eö' to ep in a ö ihiho' pa te' sunön no a pah te' to iho' non. ³A te' pamëh to iho' non to ëman va non manih pa poa vös voen vapeah varih nee to popoka' ne a jasper me konilian, ka puto vatvi non a ö ihiho' pa te' sunön pamëh. Kö' ep in o ëman in a puto pamëh to pepere' vovoa'ruvi va non manih pa vös voen vapeah pamëh, nee to popoka' ne a ëmeral. ⁴E' to te' non a 24 ö ihiho' po te' susunön to vatvi ne a ö ihiho' pa te' Sunön pamëh. Ko 24 te' susunön to vapaan ke ne poë to iho' ne nën. A ma te' sunön poë varih to ohop ne a ma ohop kakaare, ko uvan ne a ma uvan va pa te' sunön nee to nok pa gol. ⁵Manuh pa ö iho' pa te' Sunön a vakës to tavus en, me a kara to konkon non, pare' vatoo'nën e non. Manih matan a ö ihiho' no ra tönim me ro pöök vau' to ësës ne. A ma vau' poë varih, ee ra tönim me ra poa tuvuh pe Sosoenën. ⁶Manih matan a ö ihiho' pa te' Sunön, a tah to matan va non manih pa tahi', pare' parin a maaka va non manih po siroak. Ko tavi non a ö ihiho' pa te' Sunön, no a taana' tah to'to' to te' ne.

A taana' tah to'to' poë varih to te' me ne a ma matan to kopös ne a ma sioniire. ⁷A tah to'to' vamomoaan to te' va non manih pa laëon. Ka vapöök tah to'to' to te' va non manih pa kaö' oete'. Ka vakön tah to'to' no a mataneah to ep va non manih pa matan a te'. Ka vataana' tah to'to' to te' va non manih pa enen to atan non. ⁸A taana' tah to'to' poë varih to te' me ne a ma tönim me o pöh paknan, me a ma matan peo to kopös avoes e non pa sioniire. Pa potan me pa popoen nee to hikta vanot ne pa kë a ëhnan e Sunön, ko sosoe va ne manih pan,

"Apuh, e' e Sosoenën A Kikis Vi,
e' a vivihan, e' a vivihan, e' a vivihan.
Moaan voh, e' to te' voh non,

kuru me, e' to te' non,
ka amot, e' se hah ma'."

⁹O poen no a ma tah to'to' poë varih to këëkë ne sih a Te' vëh, to iho' non pa ö ihiho' pa te' Sunön to te' to'to' tamoaan non. A taana' tah to'to' poë varih to vavihvih me ne poë, pare vasunön tamoaan rakah ne sih eah, ¹⁰ko 24 te' susunön vapaan poë varih, ee to vatokon ne sih pa matan a Te' vëh to iho' non pa ö ihiho' pa te' Sunön, pare vasunön ne poë. E' to te' to'to' tamoaan non. Ee to uvan ne sih a ma uvan gol, pare vavaho' ne a ma uvan gol pee manih pa havin a ö ihiho' pa te' Sunön, pare vaëhëh va ne manih pan,

¹¹ "Sunön, eën e Sosenën pemöm.
Eën varoe kuru to te' vih rakah nom sih,
ka napan kurus se vaeö ka nom oah,
pare kë ne a ëhnöömah,
pare te' ne paan o kikis pën.
Suk ataeah,
eën to nok voh a ma moeh tah.
Po manin koman pën ka ma moeh tah tavus,
ka kuru vëh a ma tah kurus poë varih to te' e ne."

E Jon To Ep In O Miu Pëpa' Nee To Vakop Voh Ee

5 ¹Eö' to ep in o miu pëpa' rë to miu non to te' non pa papmatö pe Sosenën, to iho' non pa ö ihiho' pa te' sunön. Ke' te' non o kiun to kiun non pa poa papan, ko va'top töön non po tönim me ro pöök kok in o këntör. ²Eö' to ep me a ankerö' eh to vaato va'puh ma' vamanih pan, "A te' vih rakah eteh to te' me non a tasun pa pure' o miu pëpa' vëh, pare' kap me a ma kok in o këntör?" ³Ivëhkëk, a hikta pah te' to te' non manih pa voon va kin, me manih po oeh, me manih po komön o oeh, to te' me non a tasun pa pure' o miu pëpa' pare' ep manih koman. ⁴Eö' to okook no', suk ataeah, a hikta pah te' na to ep no, to te' me non a tasun pa pure' o miu pëpa', pare' ep manih koman. ⁵Ka pah te' va pa 24 te' susunön to te' ne paan e Sunön soe ka neo' pan, "Koe a ook. Ep ah, a Laëon vëh to tavus voh po vute' pe Juda', e' a te' vëh to vaveoh tane' po vute' pe sipuneah, e Devit, a te' sunön. E' to onoah voh o vapus. E' varoe to te' me non a tasun pa pure' o miu pëpa' ko kap o tönim me o pöök kok in o këntör varih to va'top töön ne o miu pëpa'."

E Jon To Ep A Sone' Sipsip

⁶Eö' to ep in a Sone' Sipsip to ep va non manih, pee to ip voh poë to sun vatët non pa ö ihiho' pa te' Sunön, ka taana' tah to'to' to te' ne, me o 24 te' susunön to te' ne paan e Sunön, to iho' tatavi ne a ö ihiho' pa te' Sunön. A Sone' Sipsip pamëh to te' me non a tönim me ra poa köm, me o

tönim me o pöök matan, ee o tönim me a pöök tuvuh pe Sosenen ne' to vanö voh ma' manih po oeh kurus. ⁷A Sone' Sipsip pamëh to nö ko kon en po miu pëpa' vëh to pet non pa papmatö pe Sosenen, to iho' non pa ö ihiho' pa te' Sunön. ⁸E' to kon o miu pëpa', ka taana' tah to'to' me o 24 te' susunön to te' ne paan e Sunön, ee kurus to vatokon pa havin a Sone' Sipsip. Ee to öt papaeh nö ne a ma tah su'su' to te' va non manih pa gita', me a toep nee to nok pa gol. A toep pamëh to puh non pa ma tah na to ës ke' ovoavuh vih, ee a ma hin pa napan pe Sosenen. ⁹Ee to vaëhëh ke ne na a Sone' Sipsip o vahëh voon, to te' va non manih pan,

“Eën a te' to te' me nom a tasun va pa kon o miu pëpa',
parën kap a ma kok in o këntör varih.

Suk ataeah,

ee to ip voh ee pën.

Ka manih po era' pën,

eën to voen hah voh a ma napan,

marën a he' raeo manih pe Sosenen.

Eën to voen hah a ma pöh te' to tane' ma' pa ma vute' kurus,

me a ma vu to, to te' ne po oeh,

me o sionin vakëkëh,

me o oeh ovoes.

¹⁰Eën to vate' raeo, kee tavus o vute' te' va po te' ësës he' pe sunön.

Kee te' ne o te' ësës he' pe Sosenen pea,

kee se te' ne a ma te' sunön pa matop a napan manih po oeh.”

Ee To Kë A Eñnan A Sone' Sipsip

¹¹Eö' to ep hah, parö' tēnan o vaato po ankerö' peo rakah. Ea to hikta onöt no a ëh raeo, suk ee to peo va ne manih po kösan. Ee to sun tatavi ne a ö ihiho' pa te' sunön, va'peh me a taana' tah to'to', me a 24 te' sunön to te' ne paan e Sunön. ¹²Ee to vaëhëh va'puh va ne manih pan,

“A Sone' Sipsip vëh moaan voh nee to ip,

e' to vih rakah non pa kon a tasun,

me a ma tah vihvih me o nat vih,

me o kikis apuh.

A napan kurus se vaeö me ne eah,

pare kë rakah ne a eñnaneah,

ko vaeö me a soe vavivih ke poë.”

¹³Eö' to tēnan me a ma tah to'to' kurus varih ne Sosenen to nok to te' ne pa vöön va kin, me po oeh, me komön o oeh, me manih koman tahi', ee to vaëhëh ne, pare vavaeö va ne manih pan,

“E Sosenen to iho' non pa ö ihiho' pa te' sunön va'peh me a Sone' Sipsip.

Ee pon se kokon tamoaan ne a soe vavivih,

me a he' raeo o ëhnan apuh,
me a taate' kë a ëhnëere.

O kakis apuh to te' tamoaan non manih pee!"

¹⁴Ka taana' tah to'to' piun ma', pare soe vamanih pan, "Oman!" Ko 24 te' susunön to te' ne paan e Sunön vatokon, pare vasunön e Sosoenën me a Sone' Sipsip.

A Sone' Sipsip To Kap O Tönim Me O Pöök Va'top Töön

6 ¹Eö' to ep hah, ko ep in a Sone' Sipsip to öt non o miu pëpa' vëh to te' non o tönim me o pöök va'top töön, ko kap en pa va'top töön vamomoaan. Eö' to ténan a paeh va pa taana' tah to'to' to vaato va'puh no ma', vamanih pa kara to kon ko soe ma' pan, "Nö mah!" ²Eö' to ep in a hös kakaare no a pah te' to tok non, pare' öt non a vuhun, kee he' poë o uvan pa te' sunön to onoah o vapus. A te' pamëh se onoah a ma vapus peo.

³Ka Sone' Sipsip kap en po vapöök kok in o këntör vëh to va'top töön non o miu pëpa', kö' ténan a vapöök tah to'to' to soe pan, "Nö mah!" ⁴Kö' nö eo', parö' ep a hös erera' to nö en ma'. E Sosoenën to soe vaonöt ke a te' pamëh pa mirö', ko kon ke o vakamö' vih pa napan varih po oeh kee se ip vamët o upöm te'. A ankerö' to he' poan o rapis rë marën a nok a kiu pamëh.

⁵Ka Sone' Sipsip kap en po vakön kok in o këntör vëh to va'top töön non o miu pëpa', kö' ténan a vakön tah to'to' to soe pan, "Nö mah!" Kö' nö eo', parö' ep in a hös pö. A te' to tok non pe' to öt non a sike. ⁶Eö' to ténan a tah to te' va non manih pa te' to vaato tane' no ma' pa taana' tah to'to'. E' to soe vamanih pan, "O voen va po pöh poen no a te' to kon e' to antoen e non pe' pa voen a paeh sospen taëen vuit, ke', a kukön sospen taëen bali'. Ke eën se nat nom mirö' këh raeo o hunun in o naon öliv me o voaën!"^d

⁷Ka Sone' Sipsip kap en po vataana' kok in o këntör vëh to va'top töön non o miu pëpa'. Kö' ténan a vataana' tah to'to' to soe ma' pan, "Nö mah!" ⁸Kö' nö eö', ko ep in a hös totomoen. A te' to tok non pe', a ëhnaneah e Mët. Ka vöön pa nap mët, e' to vavattet vatët nö e non ma' pa te' vëh a ëhnaneah e Mët. Ee to he' kakis raeo pon pa kiiki a ma napan po taana' vute' va po oeh avoes, me a ö nee se ip vamët o pöh vute' va po taana' vute' poë varih. O te' poë varih se mët koe ke manih po rapis rë, me o maë apuh, me a ma vu mët, me a ma tah poa va muhin.

⁹Ka Sone' Sipsip kap en po vatönim kok in o këntör vëh to va'top töön non po miu pëpa', kö' ep in a apen a ma napan varih to mët voh ee to

^d 6.6 [... pa voen a paeh sospen taëen vuit, ke', a kukön sospen taëen bali'.] A tëem no a napan to maë, suk a taëen ënëen vatëh to kökööt. Ivëh, ko voen pa ma taëen to voen vapeah.

te' ne paan a pok pe Sosoenën. A napan poë varih to öt vakis voh ne o vavaasis me a soe pe Sosoenën, ko vataare voh ne manih po to'to' pee. Ivëh, ka ma te' varih to vakihat me ne raoe, ip vamët voh ee pee. ¹⁰A ma apen a nap mët poë varih to soe vakis ma' pan, "Te' Sunön va pa ma moeh tah kurus, eën a vasio', a ma taate' pën to man rakah! O poen poanheh nën se vateen a hat manih pa ma napan varih po oeh? Parën piun o era' va pa ö nee to ip vavoh ka möm?" ¹¹Ee to he' papaeh raoe a ma ohop kakaare, kee soe ke raoe pan, "Eöm se vanot nem a si' tëëm kökööt, ke' onöt a ö no a napan varih to vakihat me a neöm se ip vamët a ma kea peöm varih, o te' va po vaman, me o te' kikiu vamanih pa ö nee to ip vamët vavoh ka neöm. E Sosoenën to vate' voh en pa tovih te' nee se ip vamët. Po poen no o tövakihat to ip vamët vahik ee pa ma napan poë varih. Ke Sosoenën se piun a hat nee to nok voh manih peöm."

¹²Ka Sone' Sipsip kap en po vatönim me o paeh kok in o këntör vëh to va'top töön non po miu pëpa'. Kö' hara' a rikrik apuh to tavus manih po oeh. A potan to popoen en vamanih po rara pö, ka sivö tavus erera' va en manih po era'. ¹³Ko vesun varih akis vu'vu' ee ma' manih po oeh vamanih pa ma voa' naon pere', no a tuvuh apuh to kö, kee vu' ma'. ¹⁴Ka akis to tamiu en, vamanih po pan nee to miu, ka ma tope me a ma to kurus vahuk këh ee pa ma ö te'te' pee. ¹⁵Ka ma te' sunön to te' me ne o ëhnan manih po oeh, me a ma susun pa nap vëvënsun, me a ma te' ötöt ö, me a ma te' eh, me a ma te' kikiu akuk, me a ma te' taihan. Ee kurus to vakoan po vëvë me o vösvös to te' ne manih pa ma moeh totope, suk ee to hikta vavatet ne a soe pe Sunön. ¹⁶Ee kurus to soe ke a ma totope me o vösvös vamanih pan, "Tahoe mah, ko ip vamët a möm kemöm mët këh a matan e Sosoenën to iho' non pa ö ihiho' pa te' sunön, me o vakmis pa Sone' Sipsip. ¹⁷Suk ataeah, o poen Apuh, pe Sosoenën me a Sone' Sipsip pa piun a ma taate' hat no a ma napan to nonok voh ne to tavus en. Ivëh, kee hikta te' onöt ne a sun vakis, pare onoah a tah pamëh."

144,000 Te' Va Israël To Kon O Vëknöm Pe Sosoenën

7 ¹A tah vëh to hik en, kö' ep in a taana' ankerö' to sun ne po taana' noton in o oeh. Ee to öt ne o taana' paknan in a tuvuh, ka tuvuh se nat non ta manih tahi', me manih po oeh, me manih po naon. ²Eö' to ep in a meh ankerö' to tane' ma' pa ö no a potan to pepeah ke no ma'. E' to öt non o tah vëknöm pe Sosoenën vëh to te' to'to' non. E' to va oe vakis a taana' ankerö' varih ne Sosoenën to he' voh raoe o kikis, marën a mirö' o oeh, me a tahi'. ³E' to soe pan, "Eöm se koe a mirö' vëhö' o oeh, ke', a tahi', me a ma naon. Emöm to iu vate' nem o vëknöm pe Sosoenën pea manih pa naira ma te' kikiu pe'. Köm pah mirö' po' a ma moeh tah." ⁴Ee to soe ka neo' a napan varih to te' me ne o vëknöm pe Sosoenën pa naire to antoen ne o 144,000 te' topnin a ma vute' kurus va Israël.

- 5 A napan to onöt ne pa 12,000 te' to kon o vëknöm to tane' ma' po vute' pe Juda',
 ko meoh 12,000 po vute' pe Ruben,
 ko meoh 12,000 po vute' pe Gat.
- 6 Ko meoh 12,000 po vute' pe Asa',
 ko meoh 12,000 po vute' pe Naptali',
 ko meoh 12,000 po vute' pe Manësa'.
- 7 Ko meoh 12,000 po vute' pe Simeon,
 ko meoh 12,000 po vute' pe Livaë,
 ko meoh 12,000 po vute' pe Isakar.
- 8 Ko meoh 12,000 po vute' pe Sebulun,
 ko meoh 12,000 po vute' pe Jeosëp,
 ko meoh 12,000 po vute' pe Bënjamin.
- A ma te' poë varih to kon o vëknöm pe Sosoenën.

A Nap Peo To Vasunön Ne E Sosoenën

9 A ma tah varih to hik en, kö' ep in a nap peo rakah to vatönun, ahikta te' to onöt non a ëh raeo. A ma napan varih to tane' ma' pa ma vute' kurus, me o sionin vakëkëh, me a ma vu to, me manih po oeh avoes. Ee to sun ne matan a ö iho' pa te' Sunön, me a Sone' Sipsip. Ee to ohop ne a ma ohop rë kakaare ko öt ne a ma pea vito. 10 Ee to soe vakis ma' pan,
 “Emöm to kë nem a ëhnan e Sosoenën pea to iho' non pa ö iho' pa te' Sunön me a Sone' Sipsip,
 ee pon to kon hah a ra,
 ka kuru vëh na to te' vavih no!”

11 O ankerö' kurus me o te' susunön to te' ne paan e Sunön, ee to sun tatavi ne a ö ihiho' pa te' sunön, va'peh me a taana' tah to'to'. Ee kurus to vatokon, ko vamösrü ne havin a ö iho' pa te' Sunön, pare vasunön ne e Sosoenën.

12 Ee to sosoe va ne manih pan,
 “Oman rakah!
 Ea to vaeö rakah vi no e Sosoenën pea,
 ka kë no a ëhnan apuh pe!
 E' to te' me non a ma kokoman vih vi,
 ka vavihvih me no eah.
 Ea se vaeö ko kë no a ëhnaneah!
 E' to te' me non o kikis apuh.
 A ma kikis kurus ne' to te' me non,
 pa ma moeh tah kurus varih ne' to te' tamoan me non.
 Oman!”

O Kamis Pee To Hik En

¹³Ka pah te' sunön hi a neö' pan, “A ma napan varih to ohop ne a ma ohop kakaare, e retereh poë varih, pare tane' ma' nih?”

¹⁴Kö' piun eah pan, “Te' apuh peö', eën to nat nom, eö' ahik.”

Ke' soe po' ka neö' pan, “A ma napan varih to te' voh ne pa tëëm no a ma kamis apuh to kon rae. Ko era' pa Sone' Sipsip ivëh to pupui vakakaare voh a ma ohop pee.

¹⁵Ivëh,

nee to sun suk ne pa matan a ö ihiho' pe Sosoenën.

Pa ma potan me pa popoen,

ee to hinhin ne manih pe Sosoenën koman a iuun vasio' pe'.

Ke Sosoenën iho' non pa ö ihiho' pa te' sunön,

e' varoe kuru se te' me ra non poë ko matop non rae.

¹⁶Ee hikta se maë hah ne,

me hikta se manoe hah ne,

ka potan hikta se pa non rae,

me a hikta tah se vëhva' non a sioniire.

¹⁷Suk ataeah,

a Sone' Sipsip to iho' topnin rakah e non pa ö iho' pa te' Sunön,

e' se matop non rae,

pare' me rae pa ö no a rën va po to'to' to te' non.

Ke Sosoenën se kon a ma punis pee vamanih pe' to hiuk va'na' a ma hunun matëëre,

kee hikta se ook hah ne.”

A Sone' Sipsip To Kap O Tönim Me O Pöök Va'top Töön

8 ¹A Sone' Sipsip to kap en po vatönim me o pöök kok in o këntör vëh po miu pëpa', ka hikto vatoe'nën me a vaato manuh pa vöön va kin pa pah pap aoa'. ²Vasuksuk nö' to ep in a tönim me a pöök ankerö' varih to sun ne pa matan e Sosoenën, ee to kon o tönim me a pöök suvin.

³Ka meh ankerö' to öt non a toep gol va pa ës a tah avoavuh vih. E' to nö ma' pare' sun non pa havin a pok, nee to nok voh pa gol. Ee to he' poë o kukuvun tah pamëh, ne' se vatös me a ma hin pa ma napan vivihan kurus pe Sosoenën. Pare' ës ke na e Sosoenën o he' manih pa pok vëh to te' non matan a ö ihiho' pe Sosoenën. ⁴Ko öh ovoavuh vih pamëh me a ma hin pa ma napan kurus pe Sosoenën to këh a koren a ankerö', ko peah en manuh pa matan e Sosoenën. ⁵Ka ankerö' kon en pa toep vëh no a ma tah ovoavuh vih to pet ne, pare' kon tane' o sura' manih pa pok ko vapuh manih pa toep. E' to vi kunah manuh po oeh, ka muhin vakës, ka kara kon en, pare' vatoe'nën en, ka rikrik ip en.

A Taana' Ankerö' To Piu A Ma Suvin

⁶Ka tönim me a pöök ankerö' varih to öt ne a tönim me a poa suvin vamatop ee pa piu a ma suvin.

⁷Ka ankerö' vavovoh piu en pa te' suvin pe!, ka rui' tutuvuh eh,^e me o sura' to hovën non po era' to tavus en ma', ko vu' en manih po oeh. E' se te' va non manih, pa ö nee to ki o oeh po kukön hum, ko pöh hum no a sura' pamëh to ës en, va'peh me a naon me a karas to te' ne manih koman o hum oeh pamëh.

⁸Ka vapöök ankerö' piu en pa suvin pe!. A tah to matan va non manih pa tope apuh to ës en. Kee vi kunah a tope pamëh to ësës non manuh tahi!. E' se te' va non manih, pa ö nee to ki a tahi' po kukön hum, ko pöh hum tahi' tarih en o era'. ⁹A ma pah tah to'to' to te' ne komön o pöh hum tahi' vëh, to mëtmët ee, me a ma parö' varih to te' ne nën to hat ee.

¹⁰Ka vakön ankerö' piu en pa suvin pe!. Ka vesun apuh vëh to ësës va non manih po vau', vu' tane' ma' akis ko vu' en manih po oeh. E' se te' va non manih, pee to ki o oeh po kukön hum, ko pöh hum no a vesun apuh pamëh to vu' manih pa ma ruen apa'puh, me pa ma rën to te' ne nën. ¹¹A ëhnan a vesun pamëh, E' To Pais Vörep, manih po to Grik, nee poka' ne, "Wormwood", e' to vu' manuh pa ma ruen to te' ne po pöh hum oeh, ka ma ruen ninin pais ee. Ka nap peo varih to kaak a ma ruen pais varih, ee to mëtmët vahik ee.

¹²Ka vataana' ankerö' piu en pa suvin pe!. E' se te' va non manih, pee to ki a potan, me a sivö, me a ma vesun po kukön hum. Ko pöh hum no a pah tah to mirö!. Ivëh, ko pöh hum pa ma vesun, me a sivö, me a potan to hikta ëman ne. Ko pöh hum in a potan me a popoen to hikta te' me ne o tékrea.

¹³Kö' ep na, parö' ep in a enen to atan vah non akis, parö' pënton a rivoneah to soe vamanih pan, "Vatamak, vatamak rakah pa ma napan varih to te' ne manih po oeh. O poen no a meh kukön ankerö' se piu a ma suvin pee, a punis apuh rakah se tavus manih pa ma napan!"

A Vatönim Ankerö' To Piu A Suvin

9 ¹Ka vatönim ankerö' piu en pa suvin pe!. Kö' ep in a vesun vëh to vu' tane' ma' pa akis, pare' vu' manih po oeh. Ee to he' poë a ki' va pa kove' ruruvun vëh no a hikta ö ne' to aton non. ²A vesun to peret en pa kove' ko öh apuh vëh to te' va non manih po öh va pa sura' to tavus ma', ko kopös en pa potan me a akis, ka muhin pah popoen en. ³Ko koka' tavus tane' ee manih po öh, ko kunah ee ma' po oeh. Ee to he' raoe o kikis, vamanih pa ö no pipihkatan to te' va ne. ⁴Ee to kon a soe vamanih

^e 8.7 [... rui' tutuvuh eh, ...] Ep manuh po Kölösöri' kusin o puk vëh.

pan, “Eöm se koe a mirö' a karas me a ma moeh tah varih to pupu ne po tonun o oeh, me a ma naon. Eöm se mirö' varoe a napan varih to hikta te' me ne o vëknöm va pe Sosoenën manih pa naire. ⁵Eöm se he' o kamis manih pa napan poë varih, ke' onöt a tönim sivö. Ivëhkëk, eöm se nat nem ip vamët raeo.” O kamis vëh nee se kon se te' va non manih pa kot pa pipihkatan. ⁶Koman a tönim sivö a napan poë varih se pah iu mët këh e ne o kamis. Ivëhkëk, ee se hikta taum ne a mët.

⁷Eö' to ep in o koka' poë varih to te' va ne manih po hös to vamatop ne a vapus. Manih pa pasuire, a tah to matan va non manih po uvan pa te' sunön nee to nok pa gol nee to uvan ne, ka ma matëere to te' va non manih pa matëero te'. ⁸A ma uviire to rëerë va non manih pa uviiro köövo, ka ma riu rivoeeere te' va ne manih pa ma riu rivot a laëon. ⁹Manih pa ma poeere, ee to ohop ne a ma ohop nee to nok po si kap, ka paknëere tatanih va non manih po karis peo, no hös to rëhrëh vëvëhö' nö ne po vapus. ¹⁰Ee to te' me ne a ma apiire to vapihpih vakmis vamanih pa pipihkatan. A ma apiire to te' me non o kikis marën a vakmis a ma napan koman a tönim sivö. ¹¹Ee to te' me ne a te' susun to matop non raeo. A te' sunön pamëh, e' a ankerö' to susun non pa matop a kove' ruruvun pamëh no a hikta ö ne' to aton non. Po to Hibru, ee to poka' ne a te' sunön pamëh, e Abadon. Ka manih po to Grik, ee to poka' ne poë e Apolyon, ke' a te' va pa mirö' a ma moeh tah.

¹²A punis apuh vamomoaan to hik en, ka meh poa punis to me' e ne pa tavus amot.

¹³Ka vatönim me a paeh ankerö' piu en pa suvin pe'. Kö' tēnan o vaato to tane' ma' po taana' noton^f va pa pok gol vëh to te' non matan e Sosoenën. ¹⁴E' to soe ke a vatönim me a paeh ankerö' vëh to öt non a suvin vamanih pan, “Eën se vatvus a taana' ankerö' varih to te' ne pa nohnoh sinten a ruen apuh vëh a Iupretis, kee nö ee.” ¹⁵Ee a taana' to tavus këh ee pa nohnoh. E' se te' va non manih, pea se keh ki a napan po kukön hum, manih komön o pöh hum o ankerö' to vamatop ro ne a aoa' pamëh, me o poen, me a sivö, me o kirismas nee se ip vamët a napan kurus to te' ne nën. ¹⁶Ee to nö, pare ununun a nap vëvënsun peo pa vapus. Ee to soe ka neo' a nap vëvënsun varih to tok ne po hös to antoen ne a 200 milion.

¹⁷Eö' to tata no', parö' ep in o hös no a napan to tok ne. Ee to ohop ne a ma ohop nee to nok po si kap. A ma ohop kap pee to erera' va non manih po tēkrea, me ee o totomoen, me ee o vovoa'ruvi. A ma pasuiro hös to te' va ne manih pa pasun a laëon, ka manih pa rivoeeere, o sura', me o vös sölpa', me o öh to tatavus no ma'. ¹⁸A kukön tah poë varih, o sura', ko öh,

^f 9.13 [... o vaato to tane' ma' po taana' noton ...] Manih po taana' noton in a pok gol to sun non a tah to matan va non manih pa köm in a purmakaö'.

me o vös sölpa', to tatavus tane' no ma' pa rivoeeero hös, ko ipip vamët e ne pa napan varih po vakön hum. ¹⁹O kikis po hös to te' non pa rivoeeere, me manih pa apiire. A ma apiire to te' va non manih po kaho' kuru', e' marën a vakmis a ma napan.

²⁰A napan varih no o sura', me o öh, me o vös sölpa' to hikta ip vamët, e'e to hikta panih a ma taate' hat pee. Ko hikta vahik pa hin suk a tuvuh hat, me a ma tah nö'nës nee to nok pa gol, me a silva', me pa bras, me po vös, me po naon. A ma tah nö'nës poë varih to hikta onöt ne a ep ka ra, me tēnan a ra, me a nö. ²¹A ma napan varih to ip vamët akuk voh o meoh upöm te', me a nap kakaveo, me a nap orora' te', me a nap rēhrēh. Ivēhkēk, ee to hikta panih a ma taate' hat pee.

A Ankero' To He' E Jon O Miu Pēpa' Vapenpen, Ke' Ēën

10 ¹A tah vëh to hik en, kö' ep in a meh ankero' eh to kunah tane' ma' manuh pa vöön va kin. A ünöh to kopös non poan, ka puto te' tatavi non a pasuneah, ka mataneah to tētēkrea va non manih pa potan, ka poa moneah to ēman va ne manih po toon no sura' to tēkrea non. ²E' to öt non o miu pēpa' sone' to te' takap e non manih pa koreneah. A papmatö va pa moneah to vakom non manih tahi', ka papkiruk pe' to vakom non po oeh. ³E' to vaato va'puh va ma' manih pa ö no a laëon to töttö va non. Ke' hik en, ka kara kon en pa tönim me a pöök. ⁴A tönim me a pöök kara poë varih to kon vahik ee, kö' iu kiun töön no' o vaato pee, ivēhkēk, eö' to tēnan a soe to tane' ma' pa vöön va kin to soe va non manih pan, “Koe a kiun töön a soe va'ih nēn to tēnan, eën se nat vatöön varoe nom po kokoman pēn!”

⁵Ka ankero' vëh nö' to ep voh to vakom non tahi' me manih po oeh to kē a papmatö va pa koreneah manuh pa vöön va kin. ⁶E' to soe a soe man kikis pa ēhnan e Sosoenën vëh, to te' tamoan non to nok voh o oeh me a ma moeh tah varih to te' ne po oeh, e' me to nok a tahi' me a ma moeh tah varih to te' ne manih tahi', e' me to nok a vöön va kin me a ma moeh tah varih to te' ne nēn. Ka ankero' soe pan, “O poen to öök en, ke Sosoenën hikta se anoeh vi non. ⁷O poen no a vatönim me a pöök ankero' se piu en pa suvin pe', ka tah vëh ne Sosoenën to iu non me a soe pe' vëh to vakoan voh non, e Sosoenën se vatvus vateera' poan. E' a soe vih voh vëh ne' to he' a ma te' kikiu pe' o te' vanēnēn soe. Ke' tavus va en pa ö ne Sosoenën to iu moaan va voh non e Ieesu' Kristo se nok.

⁸Kö' tēnan hah eo' po vaato vëh nö' to tēnan moaan voh to tane' ma' pa vöön va kin, to soe ma' pan, “Nö ah, parēn kon o miu pēpa' sone' vëh to pet takap non manih pa koren a ankero' vëh to vakom non tahi' me po oeh.”

⁹Eö' to nö eo' manuh pe', ko hin o miu pēpa' sone' ne' se he' a neö'. Ke' soe ka neö' pan, “Kon ah, parēn eën, e' se ninin vih va non manih pa hunun

in a tankekvö, ivëhkëk, eën se orom eah, ke' se vakoskos en pa komömah.”
¹⁰Eö' to kon tane' o miu pëpa' sone' manih pa ankerö', parö' eën eo'. E' to ninin vih va e non manih po hunun in a tankekvö. Ivëhkëk, eö' to orom eah, ke' vakoskos en pa komaneö'.
¹¹Ee to soe ka neo' pan, “Eën se vatvus hah a soe pe Sosoenën, suk a ma meoh upöm te' peo, me a ma meh muhin peo, me a ma meoh vu to peo, me a ma moeh te' susun peo.”

A Poa Te' Vanënën Soe To Vatvus A Soe

11 ¹Ee to he' a neo' o tokon pa vavatoe iuun, ko soe pan, “Sun ah, parën vatöe a Iuun Hinhin Apuh me a pok pe Sosoenën. Ko ëh a ma napan varih to hinhin ne sih koman a iuun pamëh. ²Ivëhkëk, eën se nat nom vatöe a ö vamaheën in a kiikin vöh to vatvi non a Iuun Hinhin Apuh. A kiikin pamëh no a nap hikto vaman to vaneah ne. A nap hikto vaman se kom tötöön a Vöön Vapenpen vëh a Jerusalëm po 42 sivö. ³Eö' se he' kikis nös a poa te' vanënën soe peö', ko vanö nös raeo. Ee pon se voh ne a ma rara to vataare non o tamak, pare vavatvus ne a soe peö' komön o 1,260 poen.”

⁴Ee pon to te' va ne manih po pöök naon öliv poë varih, me o pöök ram poë varih to sun ne matan e Sunön va po oeh kurus. ⁵A ma te' se keh punö' ne pa mirö' a poa te' vanënën soe poë varih, o sura' se tavus tane' ma' pa rivoeere, ko ës en po te' varih to vakihat me ne raeo. Ivëh, ka te' se keh punö' non pa mirö' raeo, e' se mët en. ⁶Ee pon to te' me ne o kikis marën a ötöön a uhön, ke' hikta se nus non po poen nee to vavatvus ne a soe pe Sosoenën. Pare te' pet me ne o kikis marën a ta' a ma ruen, kee tarih ee o era', me o kikis va pa he' a ma vu punis se tavus manih pa ma napan varih po oeh. Tamoaan ee se keh iu nok va ne nën, a, ee se nok suk ee po iu pee pon.

⁷Po poen ne ee pon se vahik ee pa vatvus a soe pe Sosoenën, ka tah poa vëh^s se tane' ma' pa kove' ruruvun hikta ö noton, e' se këh ma' a kove' ko peah ma', ko vapus me raeo, pare' ip vamët raeo pon. ⁸A sioniire pon se pet ne pa hanan koman a vöön apuh, na to sosoe vapipino' no, ko poka' no a ëhnaneah Södom me Isip. E' a vöön moaan voh vëh nee to ni voh e Sunön pee pa kuruse. ⁹A ma pah te' va po oeh kurus, me a ma vute', me a ma vu to, me a ma vu sionin, ee se ep a sioniire pon komön o kukön poen me a ö kök. Ee hikta se vaonöt ke ne o meoh upöm te' pa pe a sioniire. ¹⁰A napan varih po oeh to hikta vaman ne e Sosoenën, se vaeö pa ö nee to mët pon. Ee se vaeö ko eën vavihvih a ma taëën, pare vahe'he' vapiun a ma he'. Ee se nok va nën, suk a poa te' vanënën soe poë varih to he' kamis voh ne a napan varih po oeh.

§ 11.7 [... ka tah poa vëh ...] A tah poa e' o meoh ëhnan pa ankerö' vëh to matop non a kove' ruruvun hikta notoneah. Ep na manuh po Rev 9:1-11.

¹¹O kukön poen me a ö kök to oah ee, ke Sosenen vanö en pa tuvuh to'to' manih pa poa te' to pet mët ne, kee to' hah ko sun hah ee. Ka napan varih to ut ne raoe pon pah naöp suntan ee. ¹²A poa te' to tēnan o vaato apuh to tane' ma' pa vöön va kin to vaoe no ma' pan, “Peah ma' öm manih pom!” Ee pon to peah ee manuh pa vöön va kin koman a unöh, pa ö no a napan varih to vakihat me ne raoe, ee he ut ne.

¹³Varu' vakomanih, a rikrik apuh to ip ma', ko mirö' en pa pah ö va pa havun ö in a vöön, ka tönim me a taana' ö ro in a vöön to te' ne. A 7,000 te' to mët ee koman a rikrik pamëh. Ka ma napan varih to te' ne, ee to pah naöp suntan ee, pare kë rakah ee pa ehnan e Sosenen vöh pa vöön va kin.

¹⁴A vapöök punis apuh to hik en, ivëhkëk, ep ah! A si' ö ka vakön punis tavus en.

A Vatönim Me A Pöök Ankerö' To Piu A Suvin Pe'

¹⁵A vatönim me a pöök ankerö' to piu en pa suvin pe', ko vaato apuh tane' ma' pa vöön va kin to soe ma' pan,

“E Sosenen pea me e Kristo,

kuru ee pon to te' ne e Sunön pea manih po oeh kuru.

Ke' se te' non a te' Sunön va pa ma tamooan.”

¹⁶Ko 24 te' susunön to te' ne paan e Sunön, varih to iho' ne pa ma ö ihiho' pa te' sunön pee manih pa matan e Sosenen, ee to vatokon pare vasunön e Sosenen. ¹⁷Ee to soe vamanih pan,

“Sunön, Sosenen A Kikis Vi,

eën to te' nom kuru,

me pa ma tamooan voh,

eën to vakiu hah voh o kikis apuh pën,

kuru nën to taneo pa matop hah a ma tah kuru,

ivëh kemöm vaeö me nem oah.

¹⁸A napan hikto vaman to heve ne, ivëhkëk, o heve pën to tavus en.

Kuru, e' o poen no a napan varih to mët voh, e'e se te' po vahutët.

Kuru, e' o poen he' o voen vih manih pa nap kikiu pën,

ee a ma Te' Vanenen Soe pën, eën se voen raoe,

me a ma napan varih to ta a nom oah, ko te' ne o te' vivihan pën.

A ma te' varih to te' me ne o ehnan

me o te' akuk.

O poen mirö' a napan varih to seök voh o oeh to tavus en!”

Sng 2:5; 110:5; 115:13

¹⁹O 24 te' susunön to te' ne paan e Sunön to soe ee, ko hopa' vëh pa Iuun Hinhin Apuh pe Sosenen vöh pa voon va kin to taperet en. Ka

pokis kontrak pe Sosoenën to te' non nën, ka vakës tavus en, ka kara kon, pare' vatoe'nën, ka rikrik ip ma', me a ivat to ip ma', me a ma puh rui' tutuvuh eh to vu'vu' ma'.

E Köövo Me A Kuru' Apuh

12 ¹O pöh vëknöm apuh rakah to tavus manih pa akis. O vëknöm pamëh to te' va non manih. A pah köövo to voh non a potan manih pa sionineah vamanih po rara. A sivö to te' non paan a poa moneah, kö' ep in eah to uvan non o uvan va pa te' sunön to te' me non o havun me a pöök vesun. ²E' a köövo to te' non o kiuk, a si' ö ke' vahuh en, o kamis va pa ö ne' se vahuh to tavus en, ivëh, ne' to kokoe' suntan suk non.

³Eö' to ep o meoh vëknöm to tavus manih akis. E' to te' va non manih, a pah kuru' apuh erera'^h to te' non, pare' te' non o tönim me o pöök pasun me o havun köm. E' to te' me non o tönim me o pöök uvan va pa te' sunön manih pa ma pasuneah. ⁴E' to te' va non manih, pee to ki a ma vesun po kukön hum. A apin a kuru' apuh pamëh to rëh vatös en po pöh hum vesun varih to te' ne manih akis, ko vi ma' manih po oeh. Ka kuru' pamëh to te' vatët e non manih pa matan e köövo, to anoeh non e köövo se vahuh, ke' ëën e koa'. ⁵Ke köövo vahuh en pe koa' oete', ke Sosoenën vate' voh poan se matop non a ma napan varih po oeh, pare' öt non a tasun apuh va pa matop vakis a ma napan varih po oeh. Ke köövo vahuh en pe koa', ko ankerö' me peah vëvëhö' ee pe koa' manuh pa vöön va kin pe Sosoenën to iho' non pa ö ihihö' pe'. ⁶Ke köövo rusin en manuh pa moeh upin, a ö vëh ne Sosoenën to vamatop ke voh poan se' te' non. Ee se matop ne poë nën ko mamakën ne poë pa taëën po 1,260 poen.

⁷O vapus o pöh apuh to tavus manuh pa vöön va kin. E ankerö' Maëkel, me o upöm ankerö' pe', ee to vapus me a kuru' apuh. Ka kuru' me a ma te' ankerö' pe' vapus vahah me ee pee. ⁸Ivëhkëk, ee to hikta eh onöt ne a onoah o vapus. Ivëh, ka kuru' me a ma meh pe' to hikta onöt ne a te' manuh pa vöön va kin.

⁹O ankerö' pe Sosoenën to veo kunah ee pa kuru'. A kuru' vatamoaan voh pamëh, a ëhnaneah ivëh, e Satan, ke' a te' to vakihat me a rora. E' to pikpiuk non sih a napan varih po oeh, ko meeme ke këh non raoe a ma taate' totoopin. Ee to veo kunah ee ma' pa kuru', me a ma ankerö' pe' manih po oeh.

¹⁰Eö' to tēnan o vaato apuh to tane' ma' pa te' manuh pa vöön va kin to soe va non manih pan,

^h 12.3 [...] a pah kuru' apuh erera' ...] A kuru' erera' to matan va non manih pa piro' apuh rakah. E' a pah soe vapipino' to vëknöm non a punis me a tēem no a hikta te' susun to matop non a napan.

“Kuru, e Sosoenën pea to kon hah en pea, o kikis pe' to tavus vamaaka en, e' e Sunön pea.

E Kristo to te' me non o kikis, e' to kon hah a ma napan pe'. E' to kon me a tasun marën a matop a ma napan.

Suk ataeah, e Satan a te' to vakihat me a rora to vateen a ma kea me vamen pa potan me pa popoen pa matan e Sosoenën, ko soe pan, ee to nonok ne a hat.

Kuru a ma ankerö' to veo kunah ee ma' pe'.

- 11 A ma kea pea to hikta iu vi voh ne o to'to' pee,
ko hikta koman voh ne a ö nee se te' vavih ne manih po oeh.
Ee to kon tane' voh o kikis manih po era' pa Sone' Sipsip,
pare te' eh voh e ne pa vatvus a soe pe'.

Ko hikta naöp voh ne o te' se ip vamët raeo,
ka manih pa taate' pamëh, ee to onoah o vapus,
pare vöknah o vakihat.

- 12 O ankerö' to veo ee pe susun po ora' hat,
ke eöm varem to te' nem pa vöön va kin se vaeö.
Ivëhkëk, varenan peöm varih po oeh me manih tahi',
eöm se matop rakah nem, a punis apuh se tavus a neöm, ke eöm
se matop nem!

Suk e susun po ora' hat to nö voh en nös manem peöm.

E' to heve rakah e non,

suk, e' to nat e non pa ma poen pe' to hikta te' rë ne,

a si' ö hat ke Sosoenën se sunpip poan pa tah ne' to nonok non.”

13 A kuru' pamëh to ep en pe' to te' e non manih po oeh, ivëh, ke' taneo en pa veo vavah e köövo vëh to vahuh voh e koa' oete'. 14 Ivëhkëk, o ankerö' to he' e köövo a poa paknan enen apuh, marën a ö ne' se nönö pa vöön pe' pa moeh upin, ko te' ke këh no ma' a kuru' pamëh. Ee se matop vavih ne poë ko mamakën ne e köövo pa komön o kukön kirismas me a ö kök.

15 Ka kuru' pamëh to mut tane' a ruen manih pa rivoneah, ka ruen tavus en a ruen apuh, ko koko suk nö e non pe köövo. A kuru' to iu non pan, a ruen se mirö' e köövo. 16 Ivëhkëk, o oeh to va'aus en pe köövo, o oeh to panan ko orom en pa ruen vëh no a kuru' to mut tane' voh pa rivoneah. 17 Ivëh, ka kuru' heve rakah en pe köövo, ka kuru' nö en pa vapus me a ma meh koa' pe köövo. Ee a ma napan varih to vavetet ne sih a ma soe kurus pe Sosoenën, pare vaman ne a soe pe Ieesu' ko vavetet ne poë. 18 Ka kuru' pamëh to sun non po kösan manih sinten tahi'.

A Poa Tah Poa To Tavus

13 1 A kuru' apuh vëh to te' e non manih po kösan, keö' to ep in a tah poa to tavus tane' manih tahi'. E' to te' me non o havun köm,

me a tönim me a poa pasun. Manih pa havun köm, e' to te' non o havun uvan pa te' sunön. Ka manih pa ma paeh pasuneah a ma ëhnan to kiun ne, ee a ma soe to sosoe vavahat e ne pe Sosoenën. ²A tah poa pamëh nö' to ep in to matan va non manih pa pusi' apuh nee to poka' ne a lepat, ka moneah ep va non manih pa mon a bea', ka rivoneah ep va non manih pa rivon a laëon. A kuru' pamëh to he' a tasun me o kikis pe' manih pa tah poa pa nok a ma tah no a kuru' koman to onöt non a nok. ³Eö' to ep in o pöh pasun pa tah poa pamëh to matan va non manih pee to moes vamët voh poë. Ivëhkëk, a pi' hat pamëh to ana', ke' sun hah en. Ka napan varih po oeh to töhkak in a tah poa pamëh, pare vatet ee pe'. ⁴A napan to nat e ne pan, a kuru' to he' voh poan o kikis pe' manih pa tah poa. Ivëh, kee vatokon ko vasunön ne a kuru', me a tah poa, pare soe pan, “Eteh to vatoe me non a tah poa va'ih? Eteh to onöt non a vapus me poan?”

⁵E Sosoenën to vaonöt ken pa tah poa, ke' sosoe vavovoeak e non pe Sosoenën, me o kikis marën a nok a taate' pamëh po 42 sivö. ⁶A tah poa pamëh to sosoe oah e non pe Sosoenën, me e' to sosoe vavovoeak e non pa ëhnan e Sosoenën me a vöön te'te' pe', me a ma napan pe Sosoenën varih to te' ne pa vöön va kin. ⁷E Sosoenën to vaonöt ken pa tah poa, marën a vapus me a ma napan pe Sosoenën ko onoah raoe po vapus. E' to te' me non o kikis va pa tavus a te' sunön pa matop a ma napan va po oeh kurus, me a matop a ma vu to, me a matop a ma vute'.

⁸A ma napan kurus varih to te' ne po oeh, no a ëhnëere to hikta kiun non po puk va po to'to' tamoan po poen ne Sosoenën to nok voh o oeh. Ee se vasunön ne a tah poa pamëh. O puk pamëh, e' to vaneah non pa Sone' Sipsip vëh nee to ip vamët voh.

⁹A te' to te' me non a tenaneah, e' se pënton vavih a soe vëh, pare' vatet.

¹⁰E Sosoenën se keh vate' ta pah te' ke' nö pa nohnoh,
a, ke' se nö en pa nohnoh.

E Sosoenën se keh vate' ta pah te' pan, e' se mët pa koren a meh te'
to öt non o rapis rë,
a, e' se mët po rapis rë pa meh te'.

O poen no a taate' pamëh se tavus en, eöm a ma napan pe Sosoenën se sun vakis po vaman peöm.

¹¹Eö' to ep in a meh tah poa to tavus tane' varu' ma' komön o oeh. E' to te' me non a poa köm manih po kaho' pe' vamanih pa köm pa sone' sipsip oete', pare' vavaato va non manih po vaato pa pah kuru' apuh. ¹²A vapöök tah poa to kon tane' o kikis apuh manih pa tah poa vamomoan pe' to te' me non poan. E' to kiu vakis rakah e non pa rëh a ma napan varih po oeh, pa vasunön a tah poa vamomoan vëh, no a pi' pe' to ana' hah voh en. ¹³A vapöök tah poa to vatvus a ma vu tah vatoksean. A paeh tah vatoksean ne' to vatvus ivëh, e' to vatvus a sura', ke' tane' ma' kin,

ko kunah manih po oeh a napan he ep ne. ¹⁴E Sosenen to vaonot poan pa nok a ma tah vatoksean manih po kikis, no a tah poa vamomoaan to he' voh poan, pare' piuk a ma napan varih po oeh. Pare' sosoe ke non a ma napan pan, "Eom se nes suk a tah no'nes va pa tah poa vamomoaan, parom ke nem a ehneah. Moaan voh o rapis re to ip voh poan, ivehkek, e' to te' to'to' e non." ¹⁵E Sosenen to vaonot ke a vapook tah poa pa piu a tuvuh va po to'to' manih pa tah no'nes in a tah poa vamomoaan, pan a tah no'nes pameh se vaato. Ivoh, ka napan se keh hikta vasunon a tah no'nes pameh, e' to te' me non po kikis va pa ip vamet raeo.

¹⁶Ivoh ka vapook tah poa to soe, kee vaho' o veknom manih pa pap koren matö ke' pa ma naira napan kurus. O te' akuk, me a napan varih to te' me ne o ehnan, me a nap otot o, me o te' arus, me a nap taihan, me o te' kikiu akuk. ¹⁷Ka te' to hikta te' me non o veknom va pa tah poa pameh. O veknom pameh e' a ehnan a tah poa, ke', a nampa' va pa ehneah. E' to hikta onot non a voen tane' ta tah manih pa ma meh te', me e' to hikta onot non a vavoen ta tah pe'. ¹⁸A te' to te' me non o kokoman natsean, e' se eh ko nat vavoh a pusun a nampa' va pa tah poa. Suk a nampa' pameh, e' a 666, to veknom e non a ehnan a te'.

O 144,000 Te' To Vahoh O Vahoh Voon

14 ¹Eo' to ep hah ko ep in a Sone' Sipsip to sun non Tope Saon, ko 144,000 te' sun va'peh me ne poe. Ka ehnan a Sone' Sipsip me a ehnan e Tamaneah to kiun ne manih pa naire. ²Eo' to tenan o vatoe'nen vih to tane' ma' manuh pa voh va kin to te' va non manih po vatoe'nen in a ruen to koko non me o vatoe'nen apuh va pa kara. O vatoe'nen pameh no' to tenan to te' va non manih pa ma tah nee to su'su' ne, ka tanih pee te' va non manih pa tanih va pa ma gita', a tanih pameh to parin a tanih vavoh. ³O 144,000 te' varih to sun ne matan a o ihiho' pe Sosenen, me a taana' tah to'to', me o 24 te' sunon to te' ne paan e Sunon. Ee varoe a napan varih ne Sosenen to voen hah voh to vahoh ne o vahoh voon no a hikta meh te' to nat non. ⁴Ee o te' poe varih o matian, no a pop pee to totoopin ko vih rakah. Ee to vavoh vah voh ne a Sone' Sipsip pa ma o ne' to nonon non. Ke Sosenen to kon hah voh raeo topnin a ma moeh napan varih po oeh, kee te' va ne manih po vakum te' vamomoaan pe Sosenen me a Sone' Sipsip. ⁵Ee to hikta te' voh ne pa taate' piuk, ka hikta hat voh manih pa pop pee.

A Kukon Ankero' To He' A Soe

⁶Eo' to ep in a meh ankero' to nonon va kin vah non manih akis. E' to te' me non a kiu va pa vatvus a Soe Vih te'te' tamoan manih pa ma napan varih to te' ne po oeh. E' to vatvus ke non a ma napan kurus va pa ma meh muhin, me a ma vu to kurus, me a ma vute' kurus. ⁷E' to soe

vakis vamanih pan, “Vasunön nem e Sosoenën, paröm soe vamanih pan, ‘Sosoenën, eën a kakis parën te' nom e Apuh’, suk o poen to tavus en, ne' se vate' a neöm po vahutët. Eöm se vasunön nem e Sosoenën, suk ataeah, e' to nok voh o oeh, me a akis, me a tahi', me a ma moeh ruen sosone!”

⁸A vapöök ankerö' to suk en pa ankerö' vamomoaan ko soe pan, “A Vöön apuh Babiron to hat voh en! A napan to te' ne nën to rëh ke o kokoman pa napan pa taate' hin suk a ma sosoenën va pikpiuk, ko he' tonun ee pe Sosoenën vamaman. E' to te' va non manih pe köövo to öt non a kap voaën, ko vakaak a napan ke nok a taate' rëhrëh. Ivëh, ke Sosoenën se vakmis raeo.”

⁹A vakön ankerö' to suk en ma' pa meh pöök, ko soe vamanih pan, “A te' se keh vasunön a tah poa vëh me a tah nönës va pe', pare' kon o vëknöm manih pa naineah, ke', pa koreneah, ¹⁰ivëh, ke Sosoenën se vakmis va'puh oah poan. E' to vamatop moaan voh en ko se koep ma' o heve pe' manih pa kap, a kap pamëh to te' va non manih po heve pe', ka te' pamëh kaak. Ka manih pa matëero ankerö' pe Sosoenën me a Sone' Sipsip, a te' pamëh se kon a punis apuh manih po sura' to ësës non po vös salpa'. ¹¹A sura' se vakmis tamoaan non poan, ko öh to pepeah tamoaan e non. Ka napan varih to vasunön ne sih a ëhnan a tah poa, me a tah nönës va pe', pare te' me ne o vëknöm va pa ëhnaneah, a sura' hikta se mute' non pa popoen me pa potan, e' se ësës tamoaan e non.”

¹²O poen no a ma vu taate' poë varih se tavus ma', a ma napan pe Sosoenën varih to vaman ne ko vatet ne a Taate' pe Sosoenën, ko öt vakis ne o vaman pee manih pe Ieesu', ee se sun vakis.

¹³Eö' to tēnan a soe pa te' to tane' ma' pa vöön va kin to soe ma' pan, “Eën se kiun va in a soe manih pan, ‘Kuru me amot a ma napan varih to vaman voh ne e Apuh, pare mët, ee se vaeö rakah!’ ” A Tuvuh Vasio' me to soe vanën, “Ee se vaeö rakah, suk ataeah, ee to këh ee pa kiu vëhva' vëh, nee to nonok voh ne, ko nö ee ma' pa vanot. Ee to hikta nö akuk ma', ahik, a taate' vih vëh nee to nonok voh ne to nö va'peh me ma' raeo manih.”

O Poen Oes A Voa' Vuvui Manih Po Oeh

¹⁴O vaato to hik en, kö' ep in a tah unöh kakaare, ka manih pa unöh, a tah to matan va non manih pe Koa' Te' Pa Napan Kurus to iho' non. Ka manih pa pasuneah, to te' non o uvan va pa te' sunön nee to nok voh pa gol, ka manih pa koreneah, e' to öt non o rapis kakakni. ⁱ ¹⁵Ka meh ankerö' to tavus tane' ma' manuh pa Iuun Hinhin Apuh pe Sosoenën, pare' kokoe' ke ma' a te' vëh to iho' non pa unöh pan, “Eën se kon o rapis

ⁱ 14.14 [...] o rapis kakakni.] O rapis kakakni ne' to öt non to matan va non manih pa vuhun. O vu rapis pamëh nee to moesmoes ne a vuit.

pën parën moes a voa' vuvui, suk o poen va pa moes a voa' manih po oeh to tavus en.” ¹⁶Ka te' vëh to iho' non pa unöh to öt non o rapis, sun ko moes en pa voa' vuvui vëh to te' non manih po oeh.

¹⁷Ka meh ankerö' tavus tane' en ma' pa Iuun Hinhin Apuh pe Sosoenën vöh pa voon va kin. E' me to öt non o meoh rapis kakakni rakah. ¹⁸Ka meh ankerö', a te' pamëh to matop non o sura', pare' tane' ma' pa pok vapenpen. E' to kokoe' ken na pa te' vëh to öt non o rapis kakakni pan, “Eën se kon o rapis kakakni pën parën moes a ma voa' voaën vuvui to te' ne manih po oeh, parën ununun!” ¹⁹Ivëh, ka ankerö' vëh to öt non o rapis kakakni moes en pa voa' voaën vuvui pare' ununun en. Pare' vaho' hop en pa voa' voaën manih koman a ö kokon voaën. A tah pamëh to vëknöm non a ö ne Sosoenën se nok vahat va in a ma napan varih ne' to heve non raœ. ²⁰Ee to kokon ee pa voa' voaën pa nöh kokon voaën vëh to te' tavus këh non a vöön apuh. Ko hunun voaën pamëh tarih va en manih po era', ko tavus këh en ma' pa nöh apuh ko nö en ma' pa 300 kiromita', ka ruruvun to onöt non a pah mita' me a ö kök.

O Tönim Me A Poa Ankerö' To Öt Ne O Tönim Me A Poa Tah Hat Oah

15 ¹Kö' töhkak in o meoh vëknöm apuh to tavus manih akis, parö' pah kokoman vörep suk e no' pe'. A tönim me a poa ankerö' to öt ne o tönim me a poa tah hat rakah, marën a mirö' a ma napan. E' o vahik in o vakmis pe Sosoenën.

²Eö' to ep in a tah to matan va non manih pa tahi' apuh, to nok non po karas, nee to hovën po sura'. Eö' to ep me a napan varih to onoah voh o vapus pa tah poa, me a tah nön'nes va pe', me a nampa' pa ëhneaneah. Ee to sun ne sinten tahi' vëh to te' va non manih po karas ko öt nee a gita' ne Sosoenën to he' raœ.

³Ee to vahëh ne o vahëh pe Mosës, a te' kikiu pe Sosoenën, me o vahëh va pa Sone' Sipsip. O vahëh pamëh to te' va non manih pan,

“Apuh, eën e Sosoenën A Kikis Vi, *Amo 3:13*

A ma kiu kurus nën to nok e' to apuh,

emöm to ep eah to para' apuh

pamöm kokoman vörep nem. *Sng 111:2*

ka taate' pën totoopin pare' man. *Sng 145:17*

Eën a te' Sunön pa ma vute' kurus.

⁴Ivëh, keteh hikta se naöp no moah,

keteh hikta se kë non a ëhnöömah? Ahik. *Jer 10:7*

Apuh, eën varoe kuru a vivihan.

A napan kurus se nö ma' pa vasunön a oah. *Sng 86:9-10*

Suk ataeah, a taate' totoopin pën to tavus vamaaka en.” *Lo 32:4*

⁵O vaëhëh to hik en, kö' ep in a Iuun Hinhin Apuh pe Sosoenën manuh pa vöön va kin, e' a ö vasio' pe'. ⁶Ka tönim me a poa ankerö' varih to öt

ne pa tönim me a poa ta hat marën a mirö' a napan, ee to këh tavus ee ma' pa ö vasio' pe Sosoenën. Ee to ohop ne a ma ohop maaka voon matan vavih rakah. Pare voh ne a ma voh to nok non pa gol manih pa poeere. 7Ka paeh va pa taana' tah to'to' he' en po tönim me a poa toep gol manih pa tönim me a poa ankerö'. O toep poë varih to puh ne po vakmis pe Sosoenën to te' tamoaan e non. 8O öh va po kakis, me o tækrea pe Sosoenën to puh rakah non manih pa ö vasio' pamëh. Ka hikta te' to önöt non a ho pa ö vasio'. Ee se anoeh ne a tönim me a poa ankerö' se vahik a kiu manih pa tönim me a poa tah hat poë varih.

A Tönim Me A Poa Toep Gol To Te' Ne O Vakmis Pe Sosoenën

16 1Eö' to pënton o vaato apuh to tane' ma' pa te' to te' non pa Iuun Hinhin Apuh pe Sosoenën vöh pa vöön va kin, to nö non pa tönim me a poa ankerö' to soe non pan, “Eöm se nö paröm ko'ko' a tönim me a poa toep varih to te' ne o vakmis pe Sosoenën kee tako' kunah manuh po oeh!”

2Ka ankerö' vamomoaan nö, pare' koep kunah en pa toep pe' manuh tonun o oeh. Ka ma vu pi' kamis, me a ma te' ro ep vahat rakah tavus manih pa napan varih to te' me ne o vëknöm va pa tah poa, me manih pa napan to vasunön ne a tah nö'nës pe'.

3Ka vapöök ankerö' koep en pa toep pe' manih tahi'. Ka tahi' erera' en, vamanih po era' va pa te' ip, ka ma tah to'to' kurus varih tahi' mët vahik ee.

4Ka vakön ankerö' koep en pa toep pe' manih pa ma ruen apa'puh, me pa ma te' a sosone'. Ka ma ruen tavus erera' kurus rakah ee. 5Keö' pënton a ankerö' vëh to matop non a ma ruen to soe ke na e Sosoenën pan,

“Eën a vivihan rakah, ka kiiki pën to totoopin,
parën te' e nom kuru, me eën to te' moaan voh e nom.

6 A napan varih to ip vamët voh a ma te' vanënën soe pën, me a ma meh napan pën, ko era' pee to tako' voh.

Ivëh, kën se he' o era' manih pa ma napan hat poë varih, kee se kaak o era' vëh' to piun non a taate' hat nee to nok voh.”

7Keö' ténan o vaato to tane' ma' pa pok, to soe ma' pan,

“Oman rakah, Apuh, eën E Sosoenën A Kikis Vi.

Eën to kiiki nom sih a ma napan, ka kiiki pën to totoopin, pare' vih vörep.”

8Ka vataana' ankerö' ko'ko' en pa toep pe' manih pa potan, ke Sosoenën vaonöt ko hiva' va pa potan ës en pa ma napan. 9O hiva'

J 16.6 [... kee se kaak o era' vëh ...] A soe pamëh, e' a soe vapipino' pa ö ne Sosoenën se vakmis rakah a ma napan hat.

apuh va pa potan to ororan vörep, ko ës en pa ma napan. Ka napan soe vavovoeak avoe' e ne pe Sosoenën to te' me non o kikis, marën a nok a ma ta hat poë varih. Ivëhkëk, a napan to hikta panih a ma taate' hat pee, pare kë a ëhnan e Sosoenën.

¹⁰Ka vatönim ankerö' nö ko koep en pa toep pe' manuh pa ö ihihö' pa tah poa. Ka popoen kopös en pa napan varih to vavatet ne a tah poa. Ka napan poë varih kon vahat ko kokot e ne pa ma riurivoeeere, suk o kamis to apuh rakah. ¹¹Ee to kokoman ne o kamis me a ma pi' pee, pare sosoe vavahat e ne pe Sosoenën vöh pa vöön va kin. Ivëhkëk, ee to hikta panih a ma taate' hat pee.

¹²Ka vatönim me a paeh ankerö' koep en pa toep pe' manuh pa ruen apuh Iupretis. Ka ruen ana' rakah en to vamatop non a hanan no a nap susunön to tane' ma' pa ö no a potan to pepeah ke no ma', se koe ma'. ¹³Keö' ep in a kukön tuvuh hat to ep va ne manih, po rökrök to tavus tane' ma' pa rivon a kuru' apuh, me manih pa rivon a tah poa, me manih pa rivon a te' vanënën soe pikpiuk. ¹⁴A ma tuvuh hat poë varih to nonok ne sih a ma vu tah vatoksean. Ee to nö manuh pa nap susunön kurus varih to te' ne po oeh, ee to iu ne pan, o te' susunön se ununun a nap vëvënsun pee, kee se vapus po poen apuh pe Sosoenën A Kikis Vi, pa ö ne' se kiiki non a ma napan.

¹⁵“Pënton öm! Eö' e Ieesu' se nö nös vamanih pa te' kakaveo, köm se hikta nat nem po poen poanheh nö' se nö ma' manih peöm. Vaeö rakah, pa te' vëh to opoep non, pare' rara non o rara pe', ko hikta nönö pepheah vah non matëëra ma napan!”

¹⁶Ka ma tuvuh hat poë varih ununun ee, pa nap susunön manih pa ö oeh vëh nee to popoka' ne po to Hibru pan, Armagedon.

¹⁷Ka vatönim me a vapöök ankerö' koep en pa toep pe' manih akis pa tuvuh. Ko vaato apuh tane' ma' manuh pa Iuun Hinhin Apuh pa ö vasio' ihihö' pe Sosoenën, to soe no ma' pan, “E' to hik en!” ¹⁸Ka muhin vakës ka kara kon en, ko vatoe'nën, me a rikrik apuh to ip en ma'. Moaan voh a hikta rikrik to tavus voh to te' va non manih, taneo no ma' po poen ne Sosoenën to nok voh o oeh vëh. A te' rikrik pamëh to apuh ko parin a hat oah rakah. ¹⁹Ka vöön apuh vëh a Babiron takök en po kukön hum, ka ma meh vöön apuh pa ma meh napan to takök ko hat rakah ee. Ke Sosoenën kokoman avoe' e non pa taate' hat no a napan varih pa vöön vëh nee to popoka' ne Babiron Apuh to nok voh, ivëh, ke' vakaak en pa Babiron po voaën pe'. O voaën pamëh, e' o vakmis pe Sosoenën. ²⁰A rikrik apuh pamëh to ip, ka ma to, me a ma tope hik kurus ee. ²¹Ka rui' tutuvuh eh to antoen non o 50 kilogram to taru tane' ma' akis ko oon en pa napan. Ivëhkëk, a napan to hikta panih a ma taate' hat pee. Ee to vavovoeak ko sosoe vavahat avoe' e ne pe Sosoenën, suk a rui' tutuvuh eh vëh to tane' ma' akis ko oon raoe.

A Köövo Apuh Rëhrëh

17 ¹Ka paeh va pa tönim me a poa ankerö' to öt non a toep, nö ma' peö' ko soe pan, “Nö mah! Kö' vataare a oah a ö ne Sosoenën se vakmis vah va in e köövo apuh rëhrëh vëh. E köövo rëhrëh vëh to vëknöm non a vöön apuh to eok non sinten a ma ruen peo. ²A ma te' susunön varih po oeh to nok voh a ma taate' te'te'vaasi'^k va'peh me e köövo pamëh. A ma napan pet varih po oeh to nonok vavoh e ne nën. Ee te' va ne manih pee to kaak vörep o voaën ko kokoman pee nun.”

³A Tuvuh Vasio' to puh non manih peö', ko me en peö' manuh pa moeh upin. Manih pa ö pamëh, eö' to ep in a köövo to iho' non pa tah poa erera' to te' me non a ma moeh kiun peo to sosoe vavahat non e Sosoenën, to kiun non manih pa sionin a tah poa. E' to te' me non a tönim me a pöök pasun me a havun köm. ⁴Eö' to ep in e köövo to ohop non o pöök vu ohop erera', pare' ohop non a ma vu vatëk nee to nok pa gol, me a ma mök ep vavih nee to nok voh pa vös voen vapeah. Pare' öt non a kap gol, ka manih koman a kap a ma vu taate' hat, me taate' rëhrëh pe köövo pamëh, ee kurus to puh ne pa kap. E Sosoenën to hikta iu rakah non a ma taate' poë varih. ⁵Manih pa nain e köövo to kiun non o ëhnan to te' non a soe vapipino'. O ëhnan pamëh to soe va non manih pan,

“Vöön Apuh Babiron E' To Vasinan Non A Ma Moeh Köövo Rëhrëh
Me A Ma Vu Taate' Hat Kurus Rakah Varih Po Oeh.”

⁶E köövo pamëh to ip vamët voh a napan pe Sosoenën, me a napan varih to vaman ne e Ieesu', ko vavatvus voh ne a soe pe'. E köövo pamëh to kaak voh o era' pee ko kokoman pe' nun. Eö' to ep in a tah pamëh, ko toksean ko pah kokoman vörep e no'.

⁷Ka ankerö' soe ka neö' pan, “Suk ataeah, kën toksean vörep nom? Eö' se soe ka oah a pusun in a soe vakokoaan pe köövo vëh. Me a pusun in a soe vakokoaan pa tah poa vëh to te' me non o tönim me a pöök pasun, me a havun köm, ko te'te' vah non e köövo. ⁸A tah poa vëh nën to ep moaan voh nom, e' voh a to'to', ka kuru vëh, e' to hikta te' non. Ivëhkëk, amot e' se tavus këh en ma' pa kove' ruruvun hikto noton, ko peah en ma' ko ro en. ¹A napan to te' ne manih po oeh ne Sosoenën to hikta kiun voh a ëhnëere po puk va po to'to' tamoaan po poen ne' to nok voh o oeh. A napan poë varih se pah töhkak ee pa ö nee se ep a tah poa pamëh. Suk ataeah moaan voh, e' to te' non, ka kuru e' hikta te' non, ivëhkëk, e' se tavus hah en ka napan se ep e pe'.

^k **17.2** A taate' te'te'vaasi' to vëknöm non a ma te' sunön to këh ee pe Apuh e Sosoenën, pare vasunön ne a ma sosoenën vapikipiuk. ¹ **17.8** A tah poa se ro, suk a Sone' Sipsip se mirö' en pe', ke' ro avoes en.

⁹“A napan to te' me ne o kokoman vih maaka, ee se nat rakah ee pa tah vëh. O tönim me o pöök pasun, e' to vëknöm non a tönim me a poa tope vëh ne köövo to iho' non. ¹⁰Ka tönim me a poa pasun, e' to vëknöm non a tönim me a pöök te' sunön. A tönim te' sunön to ro voh ee, ka vatönim me a paeh te' ivëh to te' non kuru, ka vatönim me a pöök se tavus en ma'. Ivëhkëk, o poen ne' se tavus, a matop pe' hikta se te' varë non. ¹¹Ka tah poa vëh nën to ep moaan voh nom, e' voh a to'to', ka kuru vëh e' to hikta te' non, e' a vatönim me a kukön te' sunön. E' me to te' hop non pa tönim me a poa te' sunön, e' me se ro pet en.

¹²Ka havun köm varih nën to ep voh to vëknöm non o havun te' sunön, ee to hikta tavus te' sunön avoe' ne. Ee se kon kikis, pare tavus o te' sunön va'peh me a tah poa, ivëhkëk, a matop pee to kökööt rakah. ¹³O havun te' sunön poë varih se vapöh kokoman ee, ko he' o kikis me a tasun manih pa tah poa. ¹⁴Ee se vapus me a Sone' Sipsip, ka Sone' Sipsip onoah raoe. A Sone' Sipsip to vate' a ma te' koman pe', a ma te' poë varih to pënton a Soe Vih, me ee to vaman ko vatet ne a soe man pe'. Ee kurus a napan poë varih se onoah po vapus. Suk ataeah, e' e Sunön va pa ma vu susunön, me e' e Topoan va pa ma te' totopoan kurus varih po oeh.”

¹⁵Ka ankerö' pamëh soe ka neö' pan, “Eën to ep eom pe köövo rëhrëh vëh to vëknöm non a vöön apuh to eok non sinten a ma ruen. A ma ruen varih to vëknöm ne a ma napan, me a ma vu to, me a ma vute' kurus, me a napan kurus varih po oeh. ¹⁶Ka havun köm, me a tah poa vëh nën to ep voh, ee se vakihat me ne e köövo rëhrëh. Ee se ihan këh poë a ma ohop pe', ke' pehpeah en, pare eën a sionineah, pare ës poë po sura'. ¹⁷E Sosenën to he' voh o te' sunön o kokoman marën a nok a tah va'ih, ke' tavus vamanih pa ö ne' to soe moaan vavoh. Ee se vapöh kokoman ko he' a tasun pee manuh pa tah poa. Ee se nonok va ne nën, ke' öök pa ö ne Sosenën to soe a ö se' öök. ¹⁸Ke köövo vëh nën to ep voh nom, e' to vëknöm non a vöön apuh to matop non a ma te' sunön varih po oeh avoes.”

A Babiron Se Hat En

18 ¹A tah vëh to hik en, kö' ep in a meh ankerö' to tane' ma' pa vöön va kin ko kunah ma'. E' to te' me non o maaka me o kikis apuh, ko maaka pe' ëman ke non po oeh avoes. ²E' to kokoe' suntan rakah, pare' soe pan,

“A vöön apuh vëh Babiron to hat en, e' to hat en!

E' to tavus en a ö te'te' pa ma tuvuh hat,

e' to tavus en a ö te'te' pa ma tuvuh, hat me a ma növan hat to te' ne nën,

me a ma növan hat oah rakah to te' ne nën,

³Suk ataeah, a napan poë varih to vasunön voh ne a ma sosenën vapikpiuk.

- E' to te' va non manih pee to nok a taate' rëhrëh me e köövo pamëh,
 ka taate' pamëh to te' va non manih pee to kaak o rui' eh.
 Ka ma te' susunön varih po oeh, ee me to vasunön voh ne a ma sosoenën vapikipiuk.
 Ka taate' pamëh to te' va non manih pee to nok a taate' rëhrëh me e köövo pamëh.
 Me a ma napan varih po oeh to vavavoen kako' voh ne,
 pare nonok moni' vapeo voh ne.
 Suk e köövo pamëh to voen tane' manih pee a ma moeh tah peo ne' to iu non,
 ivëhpëhkëk, e' to öt vapeo oah e non pa ma tah ne' se öt non.”
- 4 Eö' to tēnan a meh te' manuh pa vöön va kin to soe ma' pan,
 “Ma napan peö', eöm se këh tavus ma' a vöön manem!
 Eöm se koe a vamomhë me a te' manem, me a ma taate' hat pe',
 tome' a ma punis pe' kopös a neöm.
- 5 A ma taate' hat pe' to parin a peo vörep, ko te' öök e ne na manuh kin,
 ke Sosoenën nat tamoaan e non pa ma hat pe'.
- 6 Eöm se nat e nem pa ma taate' hat ne köövo rëhrëh pamëh
 to nok manih pa ma meh te', ko piun hah keah a ma taate' hat poë varih.
 E' to ununun voh a ma taate' hat pe', kee tavus vapeo.
 Ivëh, köm se piun oah pet keah a ma taate' hat ne' to nok voh, to onöt non a ma taate' hat pe' ne' to nok manih po upöm te'.
 E' to hovën va'puh voh o rui' eh manih pa kap, ko he' a ma napan pe Sosoenën.
 Ivëh, ke eöm se hovën va'puh oah pet o rui' eh manih pa kap, ko he' varu' eah ke' kaak.
- 7 E' to kë koman hah voh non a ëhnaneah, ko ununun voh non a ma tah peo vihvih.
 Ivëh, köm se he' punis eah, ke' kon kamis to onöt va non manih pa ma tah poë varih ne' to nonok voh non, ke' se ook vörep.
 E' koman to sosoe va non manih pan, 'Eö' e köövo sunön to iho' no' pa matop a ma napan,
 ko hikta te' no' a köövo amop ne voe to mët këh voh. Eö' hikta se okook no' ko hikta se taum no' ta punis.'
- 8 Ivëh, ka ma vu hat rakah se tavus manih pe' po pöh poen ro.
 O maë apuh se tavus, me a nap peo se mët, me a napan se vaokook ne.
 A sura' se ës vahik a Babiron.
 E Sunön, e Sosoenën to te' me non o kikis se kiiki poan, ko piun ke poan a ma vu punis apuh oah rakah.”

⁹A ma te' sunön varih po oeh to iu tavus voh ne o te' öt ö vörep. Suk a köövo pamëh to voen tane' manih pee, a ma moeh tah peo ne' to iu non, ivëhpëhkëk, e' to öt vapeo oah e non pa ma tah ne' se öt non. Ee se vaokook ne pa ö see ep in o öh va pa sura' to ësës non a vöön. ¹⁰Ee se sun varo e ne ma' to nanaöp e ne pa huk vatët tome' a punis nö ma' pee, pare soe ma' pan,

“Vaururuan! Vaururuan rakah vöön apuh Babiron!

Eën a vöön apuh parën eh rakah me!

Pa pah aoa' ro nën to kon eöm pa piun in a ma taate' hat nën to nok voh!”

¹¹A ma nap vavavoen kako' varih po oeh, ee se kokoman e ne pa vöön pamëh, ko vaokook e ne, suk ataeah, a hikta te' se voen tane' hah ta kako' manih pa ma iuun kako' pee. ¹²A ma kako' poë varih, e' a gol, ka silva', vös voen vapeah, mök voen vapeah, me a rara kakaare, me a ma vu rara erera', me o rara silka'. Me a naon ovoavuh vih, me a ma tah to nok ne pa ma riu elepen, me a ma tah nee to nok po naon voen vapeah, me po bras, me po aën, me po vös nee to popoka' ne a mapol. ¹³Ka ma kako' nee to vavoen voh ne ivaräh, sinamon, tö'tö' ënëën, a ma tah ësës ovoavuh vih, a tah uhuh ovoavuh vih, me o voaën, me o vamom nee to nok po naon öliv, me o praoa' vih, me o vuit, me o purmakaö', me o sipsip, me o hös, me o karis, me a ma te' kikiu akuk, me a ma te' nee to öt pa tëëm vavapus. A ma tah kurus varih no a hikta te' se vavavoen hah non. ¹⁴Ka nap vavavoen kako' se soe vamanih pan,

“Babiron, a ma tah vih varih no a komömah to iu non to ro këh ee pën,

me a ma ohop vavatëk vavih pën to ro këh ee pën.

A ma napan hikta se ep hah ka nom oah to öt nom a ma tah poë varih!”

¹⁵Ka nap vavavoen kako' voh manih pa vöön pamëh, ee se nanaöp rakah e ne po kamis hat vëh no a vöön apuh to kon. Ee se sun varo këh e ne ma' pa vöön me o kokoman karë, ko vaokook ne. ¹⁶Ee se soe vamanih pan,

“Varenan! Varenan rakah pa vöön apuh vëh!

Moaan voh, e' to ohop voh non a ma ohop kakaare vihvih, me a ma vu ohop erera',

ko ohop me voh non a ma ohop nee to nok voh pa gol, me a ma mök ep vavih voen vapeah nee to mök voh ne!

¹⁷Pa pah aoa' ro rakah no a ma moni' apuh, me vatëk ep vavih poë varih to hik kurus ee.”

Ka ma te' vavanö parö', me a ma te' varih to kiu ne komön o parö', me a ma te' varih to kokon moni' ne pa voen a ma tah va tahi', a napan poë varih to sun varo këh e ne ma' pa vöön va Babiron. ¹⁸Ee to sun varo ne ma' pare ep ne ma' o öh va pa vöön vëh to ësës non, pare vaokook varenan vamanih

pan, “A vöön poanheh to te' va non manih pa vöön apuh vëh?”¹⁹ Ee kurus to vi peah o vavoan manih pa pasuire, ko vaokook ne pare sosoe ne pan,

“Varenan! Varenan rakah pa vöön apuh vëh!

A ma tövaneah pa ma parö' varih to nönö voh ne tahi',

ee to tavus voh o te' öt ö pa ma moni' va pa vöön apuh vëh,
a pah aoa' ro rakah no a ma tah kurus poë varih to hik ee!

²⁰ Eöm varem pa vöön va kin me a ma napan pe Sosoenën,

me a ma te' vanënën soe, me o aposol, eöm se vaeö rakah nem pa
tah vëh to tavus manih pa vöön vëh.

E Sosoenën to kiiki voh en pa ma taate' pe', ko piun ke poan a punis
no a vöön vëh to nok voh manih peöm.”

²¹ A tah vëh to hik en, ke eö' ep in a ankerö' eh to kon a vös apuh
kokon vuit, ko vi kunah en pe' manuh tahi'. Pare' soe pan,

“A ö vëh nee se vi kunah va in a vöön apuh va Babiron,
ka napan hikta se ep hah ne poë.

²² Ivëh, ka tanih va pa gita', me a kuru, me a suvin, me a ma moeh vu
tah tatanih,

ee hikta se tēnan hah ne a ma vu tanih poë varih manih pën.

Ka ma napan varih to vavaasis vahik voh ma' pa ma vu kiu,

ee hikta se ep hah ne a ma napan poë varih to te' hah ne manih
pën.

A tanih va pa ma tah nonok taēën,

no a napan hikta se tēnan hah ne manih pën.

²³ O ēman va po ram, nee se hikta se ep hah ne manih pën.

Ka rivoeero te' tövaen, me a köövo tövaen to iu vaen ne,
ee hikta se tēnan hah ne raoe manih pën.

Moaan voh a ma napan voh pën varih to matop voh ne a ma kiu
moni', ko te' ne a nap sunön öt ö pa matëëra ma napan.

Ke eën Babiron, eën to nonok voh nom a ma ëto' orora' te' manih pa
ma upöm napan va po oeh.”

²⁴ E Sosoenën to he' punis a vöön va Babiron, suk o era' po te' vanënën
soe, me a ma napan pe Sosoenën to tako' voh koman pa vöön pamëh.

A Ma Napan Se Vaeö Pa Vöön Babiron To Ęs

19 ¹ A tah vëh to hik en, kö' tēnan a tah to te' va non manih pa
napan peo to vavapoeh ne manuh pa vöön va kin to vaëhëh va ne
manih pan,

“Ea se kë a ëhnan e Sosoenën!

E Sosoenën pea a paeh ro to kon hah a ra,

e' o maaka pea me e' e Apuh pea pare' te' me non o kikis.

² Manih pa taate' man, me a taate' totoopin pe', e' se kiiki non a ma
napan.

E köövo apuh rêhrêh vêh to mirö' voh a ma napan varih po oeh pa taate' rêhrêh pe', pa ö no a napan poë varih to nö kee e Sosoenën ko vasunön ne a ma sosoenën vapikpiuk.

Ivêh, ke Sosoenën piun hah keah a hat.

E Sosoenën to he' punis poan, suk e' to ip vamêt voh a ma nap kiu pe', ko era' pee tako'."

³Kee vaêhêh hahah kov ee ma' pan,

"Ea se kê a êhnan e Sosoenën!

O öh va pa sura' vêh to ês pa vöön apuh to pepeah tamoan e non ma!"

⁴Ko 24 te' sunön to te' ne paan e Sunön, me a tana' tah to'to', ee to vatokon, pare vasunön ee pe Sosoenën to iho' non pa ö ihiho' pa te' sunön, ko sosoe ne pan,

"Oman rakah, ea se kê a êhnan e Sosoenën!"

⁵Ka manih pa ö ihiho' pe Sosoenën, eö' to tēnan a paeh te' to vaato tane' ma' nēn, to soe ma' pan,

"Kê a êhnan e Sosoenën pea,

eöm a ma te' kikiu pe Sosoenën,

eöm a ma te' to kê nem eah,

eöm a ma te' to te' me nem o êhnan,

me eöm a nap hik to êhnan,

Eöm kurus se kê a êhnan e Sosoenën!"

A Sone' Sipsip Se Vaen, Kee Nok A Taëen Apuh

⁶Kö' tēnan a tah to te' va non manih po vaato pa nap peo, vamanih po tamanoan va pa totruen apuh, me vamanih pa kara to kon. Eö' to pēnton raoe to vaêhêh ne pan,

"Ea se kê a êhnan e Sosoenën!

E Sunön pea, E Sosoenën A Kikis Vi, pare' te' me non o kikis.

Kuru, e' to te' non a te' Sunön.

⁷Kuru ea se te' vaeö rakah no,

ko kê no a êhnaneah.

Pe' o poen vaen pa Sone' Sipsip to tavus en.

Ke köövo tövaen pe' to vamatop e non pa vaen.^m

⁸E Sosoenën to he' poan o ohop vih maaka, kakaare, matan vavih, ke' ohop en."

O ohop kakaare matan vavih pamêh, to vëknöm non a taate' vih no a napan pe Sosoenën to nonok ne.

⁹Ka ankerö' soe ka neö' pan, "Kiun töön a soe vêh, 'Vaeö rakah pa ma napan varih ne Sosoenën to vae manih pa taëen apuh va po vaen va

^m 19.7 A Sone' Sipsip se vaen me e köövo pe', e' a soe vapipino' va pe Ieesu' Kristo se hah ma' pa kon a napan pe Kristo, kee nö ko te' va'peh tamoan me ne poë.

pa Sone! Sipsip.’” Pare! soe pet en pan, “A soe vëh, e! a soe vamaman pe Sosoenën.”

¹⁰Ivëh, kö! vatokon pa havin mon a ankerol! pa vasunön eah, ivëhkëk, e! to soe ka neö! pan, “Eën se koe a nok va nën! Suk, eö! a meh te! kikiu varoe to te! va e no! pën, me a ma kea pën varih to vaman ne e Ieesu!, ko vavatvus nem a ëhnaneah. Eën se vasunön varoe nom e Sosoenën a paeh! Suk a Tuvuh Vasio! pe Topoan to kunkuin non o te! vanënën soe pa vatvus a soe pe Sosoenën, me o te! varih to vatvus ne a ëhnan e Ieesu!”

A Te' To Tok Pa Hös Kakaare

¹¹Eö! to ep in o hopa! va pa vöön va kin to taperet ka hös kakaare tavus ma!. Ka te! to iho! non pa hös a ëhnaneah ivëh, “A Te! To Matop Non A Taate! Totoopin Varoe, Me E! To Matop Vavih Non A Kiu Pe!” A taate! kiiki pe! manih po vapus, me manih pa ma hat pa napan, e! to vavatet non sih a taate! totoopin rakah. ¹²A mataneah to ëssä va non manih po sura!, pare! te! me non a ma uvan peo va pa te! sunön manih pa pasuneah. Manih pa sionineah, o pöh ëhnan to te! non no a hikta meh te! to nat non, e! varoe a paeh to nat non. ¹³O ohop vëh ne! to ohop non no o era! to pupui voh,ⁿ kee poka! ne poë, “A Soe Pe Sosoenën.” ¹⁴A nap vëvënsun va manuh pa vöön va kin to tok pa ma hös kakaare pee ko suksuk nö ne poë, ko ohop ne a ma ohop kakaare voon matan vavih vörep. ¹⁵O rapis rë kakakni to huh tavus tane! no ma! pa rivoneah. E! se ip vamët a ma vute! varih to vakihat me ne poë po rapis rë pamëh. E! to te! me non o kakis pa matop a ma napan varih po oeh, e! se vakmis a ma napan varih to këh voh e Sosoenën, a tah pamëh to varës non poan. ¹⁶Manih po ohop pe!, me manih pa moneah, o kiun vëh to te! non,

SUNÖN VA PA MA VU SUSUNÖN, ME TOPOAN VA PA MA TE!
TOTOPOAN.

¹⁷Kö! ep in a ankerol! to sun non matan a potan, to vavaoe non o növan kurus varih to nönö va ne manih akis, pan, “Eöm se nö ma! ko vatönun manih pa taëën apuh ne Sosoenën to vamatop! ¹⁸Eöm se nö ma!, paröm ëën o raraun sioniiro te! susunön to mët voh, me a nap susun va pa nap vëvënsun, me a nap vëvënsun, me a raraun i ro hös, me a napan to tok ne po hös, me a ma napan kurus, me a nap taihan, me a nap kikiu akuk, me a napan varih to te! ne o ëhnan, me a napan hikto ëhnan.”

¹⁹Kö! ep in a tah poa, me a ma nap susunön va po oeh, me a ma nap vëvënsun pee to vatönun. Ee to iu vapus me ne a Te! vëh to iho! non pa hös va!peh me a ma nap vëvënsun pe!. ²⁰A tah poa va!peh me a te! vanënën soe pikpiuk, e! to vanö en pee pa nohnoh. A te! vanënën soe

ⁿ 19.13 O era! vëh to tane! voh ma! po te! varih ne! to vakihat me non, ko era! pee tako! voh manih po ohop pe!.

pikpiuk pamëh to nonok ke non a tah poa a ma tah vatoksean. Ka manih pa taate' pamëh, e' to pikpiuk voh non a ma napan, kee kon o vëknöm va pa tah poa, me a ö nee to kë voh ne a tah nö'nës va pe'. A tah poa, me a te' vanënen soe pikpiuk, no a Te' vëh to iho' non pa hös kakaare to vi to'to' en na pee pon manuh pa kove' sura' ororan to ësës tamoan non po vös salpa'. ²¹Ka te' vëh to tok non pa hös, to ip vamët en pa nap vëvënsun po rapis rë vëh to tane' no ma' pa rivoneah. Ko növan mahun rakah ee pa ëen a ma sioniira ma nap vëvënsun poë varih.

E Susun Po Ora' Hat To Te' Non Pa Nohnoh Po 1,000 Kirismas

20 ¹Ivëh, kö' ep in a ankerο' to kunah tane' ma' pa vöön va kin. E' to öt non a ki' va pa kove' ruruvun hikto noton va'peh me o urih eh. ²E' to öt töön non a kuru' apuh, a kuru' vatamoan voh vëh. A kuru' vëh, e susun po ora' hat, a te' to vakihat me a rora, me e' to vavateen non sih a ma napan pa hat. A ankerο' to noh töön poan po uris eh, ke' te' antoen non po 1,000 kirismas. ³A ankerο' to vi kunah poan manuh pa kove' ruruvun hikto noton, ko panih pip en na pe' po hopa', suk a ö ne' se nat non tavus hah ma' pa piuk vatëh a ma napan. E' se te' antoen non po 1,000 kirismas, ka ankerο' pah vatvus hah poan, ke' vavih ro vah non pa ma si' poen.

⁴Eö' to ep me a ma ö ihiho' pa te' sunön no a ma napan to iho' ne. A ma te' poë varih no a ma meh te' to moes kurus voh a ma ko'koeere, kee mët vahik ee. A ma meh to moes kurus a ma ko'koeere, suk ee to vaman voh ne e Ieesu', ko vatvus voh ne a ëhneaneah, ko öt vakis voh ne a soe pe Sosenën. Ee me to hikta vasunön voh ne a tah poa va'peh me a tah nö'nës va pe', pare hikta kon voh manih pa naire me pa koreere o vëknöm pe'. Ee to kon hah o to'to', ko iho' ne pa ma ö ihiho' pa te' sunön. E Sosenën to he' rae a kiu va pa kiiki a ma taate' pa napan. Pare te' va ne manih po te' sunön va'peh me e Kristo po 1,000 kirismas. ⁵A ma meh napan varih to mët voh to hikta kon voh o to'to', ee se anoeh ne o 1,000 kirismas se oah voh. A tah vëh, e' a sun momoan tane' hah pa mët. ⁶A ma napan varih to sun tane' hah momoan pa mët, ee se vaeö rakah. Suk ataeah, ee a ma te' vivihan pe Sosenën, ke' hikta se vate' non rae po vahutët, ko vaho' me rae pa kove' sura' ororan vëh to ësës tamoan non po vös salpa', ka tah vëh, e' a vapöök mët. Ee se te' va ne manih pa ma te' ësës he' pe Sosenën me e Kristo. Ee se te' ne a ma te' sunön va'peh me e Kristo komön 1,000 kirismas.

E Susun Po Ora' Hat To Kon Vahat

⁷O 1,000 kirismas to oah ee, ka ankerο' se peret ken pe susun po ora' hat pa kove' ruruvun hikto noton, ke' tavus këh en ma' pa nohnoh. ⁸E' se tavus ma', pare' taneo en pa piuk a ma napan varih to te' ne ma' po

taana' noton in o oeh, o vute' va pe Gog, me Megok. E susun po ora' hat se ununun raeo, pare' kunkuin o vapus ko vapus me e Sosoenën. Ee to te' peo va ne manih po kösan vëh sinten tahi'. ⁹Ee se nö po oeh avoes, pare tapön a vöön no a ma napan pe Sosoenën to te' ne, a vöön pamëh ne Sosoenën to iu oah rakah non. Ivëhkëk, o sura' se tane' ma' pa vöön va kin ko pah ës vahik en pee. ¹⁰E susun po ora' hat to piuk voh raeo, ivëh, ke Sosoenën vi kunah en pe' manuh pa kove' sura' ororan to ësës tamoan non po vös salpa', pa ö no a tah poa, me a te' vanënën soe pikpiuk to te' tamoan ne. Ee se kakamis tamoan rakah e ne pa popoen me pa potan.

O Kiiki Apuh To Tavus En

¹¹Eö' to ep me a ö ihiho' apuh kakaare pa te' sunön, ko ep me eö' pa pah Te' to iho' non nën. O oeh me akis to ro këh ee pe', ko hikta te' hah ne. ¹²Kö' ep in a nap mët hikto ëhnan, me a napan akuk to te' ne, ee to sun ne pa matan a ö ihiho' pa te' sunön. Ka te' sunön ta', ka ma ankerö' kakap ee pa ma puk pa ep pa ma tah to kiun suk non a ma tah no a napan poë varih to nonok voh ne, pare pah kap pet ee po puk vëh, no a ëhnan a napan varih se te' to'to' va'peh me ne e Sosoenën. Ke Sosoenën kiiki a ma napan pa ma taate' voh pee, me a ma tah nee to nonok voh ne, pa ö ne' to kiun va non manih po puk. ¹³A ma napan varih to mët voh tahi', to nö, pare sun po vahutët pe Sosoenën. A napan varih to mët moaan voh ka apeere nö manuh pa vöön pa nap mët, me o te' varih to te' ne pa mët, to nö, ee me to sun po vahutët pe Sosoenën. Ke Sosoenën, a tökiiki vahutët, to kiiki papaeh raeo, to onöt non a ma taate' nee to nok voh. ¹⁴Ke Sosoenën vahik en pa vöön pa nap mët, me a mët. A poa tah poë varih to hikta te' hah ne, suk e Sosoenën to vi en na pee pon manuh pa kove' sura' ororan vëh to ësës tamoan non po vös salpa', ka tah vëh, e' a vapöök mët. ¹⁵Ka napan kurus varih no a ëhnëere to hikta te' non manih po Puk va po To'to', ee se vi kunah na raeo manuh pa kove' sura' ororan apuh to ësës tamoan non po vös salpa'.

O Oeh Me A Akis Voon To Tavus

21 ¹Eö' to ep in o oeh me a akis voon to tavus ma'. A akis me o oeh vamoan to hik ee, me a tahi' to hikta te' hah non. ²Eö' to ep pet me in a vöön voon vasio' vëh a Jerusalëm to kunah tane' ma' manuh pa vöön va kin pe Sosoenën. E' to te' me non o vatëk vih vamanih pe köövo tövaen, pare' vamatop ke non e voe pe'. ³Eö' to tēnan o vaato apuh to tane' ma' pa ö ihiho' pe Sunön to soe vakis ma' pan, "Pēnton öm! E Sosoenën se te' va'peh me e non pa ma napan, e' se te' topnin non raeo, kee te' ne a ma napan pe Sosoenën. ⁴E' se hiuk va'na' këh en pee pa hunun matëere, ka napan hikta se mëtmët hah ne, me ahik hah

to kokoman punis, me a hikta kon kamis. A ma tah to te' voh ne to hik kurus rakah ee, me ahik hah to vaokook.”

⁵Ka Te' vëh to iho' non pa ö ihiho' pa te' sunön soe pan, “Pënton ah! Eö' to vavate' vavoon hah no' a ma moeh tah!” Pare' soe pet pan, “Kiun töön a ma tah varih manih, suk a soe vëh a pah man rakah to onöt e non pa ö no a ma napan kurus se vaman rakah ee pe'.” ⁶E' to soe pet ka neo' pan, “A ma tah kurus varih to tanok vahik ee. Eö' varoe kuru a taneo pa ma moeh tah, parö' vasuksuk hah no' ma'. Eö' a Taneo in a ma tah kurus, me eö' a Vahik in a ma tah kurus. A te' se keh manoe non, eö' se he' eah a ruen to tane' no ma' pa rën va po to'to'. E' se kon vamanih po he' pe', a hikto voen nën. ⁷Ka te' se keh öt vakis non o vaman ko onoah po vapus va pa taate' hat, eo' se he' eah a ma tah poë varih, kö' se te' no' e Sosoenën pe', ke' se te' non e koa' peö'. ⁸Ivëhkëk, eteh to nanaöp non ko vahuk hah këh o vaman, me eteh to hikta vaman non, me a nap nonok a ma moeh taate' hat rakah, me a ma te' ipip vamët te', me a ma te' rëhrëh, me a ma te' to orora' ne o upöm te', me a ma te' to vasunön ne o sosoenën vapikpiuk, me a nap pikpiuk, ee a pap te' poë varih se nö pa kove' sura' ororan to ësës tamoaan non po vös salpa'. E' a vapöök mët.”

A Jerusalëm Voon

⁹Ka paeh va pa tönim me a pöök ankerö' varih to öt ne pa tönim me a pöök toep varih, to te' me ne a ma tah hat marën a mirö' a napan pa vahik o heve pe Sosoenën, to nö ma' peö' pare' soe pan, “Nö mah, kö' vataare a oah e muriaknan pa Sone' Sipsip to vaen vahik me en pe'.” ¹⁰Ka Tuvuh Vasio' puh rakah en manih peö', ka ankerö' me en peö' manuh pa tope a pah apuh, ko vakin vörep. E' to me a neö' pa vataare a vöön voon vasio' vëh, a Jerusalëm, a vöön pe Sosoenën to kunah tane' ma' pa vöön va kin. ¹¹O maaka kakis apuh pe Sosoenën to ëman non pa vöön pamëh. O ëman pe' to ep vamanin rakah e non, vamanih pa vös saspä' to para' maaka vörep va non manih po siroak. ¹²A vöön apuh pamëh to te' non a kiikin va kin, pare' te' non o havun me a pöök ankerö', a ma papaeh to sun nö ne matan o havun me o pöök hopa'. Manih po hopa' to kiun non a ma ëhnëero havun me a pöök sipuiira napan va Israël. ¹³E' to te' non a ma kukön hopa' pa pah papan, o kukön pa ö no a potan to pepeah ke no ma', ko kukön pa ö no potan to kukunah ke non, ko kukön pa papkiruk, me o kukön pa papmatö. ¹⁴A kiikin in a vöön pamëh nee to eok voh ke' tok non na pa tonun in a havun me a pöök vös, ke' ötöön vakis non ma' a kusin a kiikin, pare' te' non a ëhnëero aposol pa Sone' Sipsip to kiun ne nën.

¹⁵A ankerö' vëh to vavaato me voh a no neö', to öt non o tokon nee to nok voh pa gol marën a vatoe a rë pa vöön, me a ma hopa', me a kiikin.

¹⁶A vöön a totoopin pa taana' ö noton, a papanö', me a rë pa vöön, e' o

pöh vatoe rakah. A ankero' to vatoe en pa rë, me a papanö' pa vöön po tokon pe', ka vöön to antoen va non manih pa 2,400 kiromita'.

¹⁷Ka ankero' vatoe en pa po' pa kiikin ke' antoen va non manih pa 66 mita'. O vu vatoe pamëh no a ankero' to vatet no a napan to vavatoe ne a ma tah. ¹⁸A kiikin pamëh to tavi non a vöön, ne Sosoenën to eok po vös saspä', ka vöön to eok non pa gol varoe, ke' ëman va non manih po siroak. ¹⁹O vös varih to vakusin ne pa kiikin pamëh, to eok ne pa ma vu vös voen vapeah rakah. A vös vih vamomoaan to vakusin non pa kiikin, e' a vös saspä'. Ka vapöök vös, e' a vös vovoa'ruvi, a vös sapaëa'. Ka vakön vös, e' a kakaare, e' a vös aget. Ka vataana', e' a vös pepere', e' a vös ëmeral. ²⁰Ka vatönim, e' a vös sadönikis, e' to erera' ko kakaare. Ka tönim me a paeh, e' a vös konilian, e' a erera'. Ka vatönim me a pöök, e' a vös krisolaët, e' a totomoen. Ka vatönim me a kukön, e' a vös beril, e' a meh vu vös pepere'. Ka vatönim me a taana', e' a vös topas, e' a meh vu vös totomoen. Ka vahavun, e' a vös krisopres, e' a pepere' me e' to totomoen. Ka vahavun me a paeh, e' a vös haëasin, e' a meh vu vös vovoa'ruvi. Ka vahavun me a pöök, e' a vös ametis, e' a meh vu vös erera'. ²¹O havun me o pöök hopa' va pa kiikin poë varih ne Sosoenën to eok po havun me o pöök mök voen vapeah. A ma hanan varih koman a vöön to eok ne pa gol, ko ëman va ne manih po siroak.

²²Eö' to hikta ep no' a Iuun Hinhin Apuh koman a vöön apuh pamëh. E Apuh, e Sosoenën A Kikis Vi va'peh me a Sone' Sipsip, ee pon to te' va ne manih pa Iuun Hinhin Apuh. ²³A vöön pamëh, a hikto maaka va pa potan, me a sivö se vamaaka non a vöön, suk o maaka kikis apuh pe Sosoenën koman to ëman ke non pa vöön. Ka Sone' Sipsip te' va non manih po maaka va pa vöön. ²⁴A ma moeh vu napan se nönö vah ne koman o maaka va pa vöön pamëh. Ka ma te' sunön va pa ma muhin kurus se te'te' ne ma' a ma kokoek pee manih pe'. ²⁵A ma hopa' va pa vöön to hikta se papanih ne, ee se te' taperet e ne, suk a hikta popoen manih pa vöön pamëh. ²⁶A ma tah kokoek me a ma moni' pa napan kurus, ee se te' ma' manih pe'. ²⁷Ivëhkëk, a ma nap pikpiuk, me a nap nonok a ma vu taate' hat, me a ma te' rëhrëh, ee se hikta vos rakah pa vöön pamëh. A ma napan varoe varih no a Sone' Sipsip to kiun töön voh a ma ëhnëere manih komön o puk va po to'to' tamoaan.

E Jon To Ep In A Ruen, Me O Naon Va Po To'to'

22 ¹A ankero' to vataare me en peö' pa pah ruen apuh, a ruen va pa he' o to'to' tamoaan. E' to ëman va non manih pa ö no siroak to ëman va non. E' to koko tane' no ma' pa ö ihiho' pa te' sunön va'peh me a Sone' Sipsip, ²pare' koko topnin non a hanan va pa vöön. Manih sinten a poa pap ruen, o naon to he' non o to'to' manih pa ma napan, to sun non. Komön o pöh kirismas pa ma sivö kurus, o naon pamëh to vovoa' non. Ka

ma pa' naon, e' marën a vato' hah a ma napan kurus. ³Ka ma tah kurus ne Sosoenën to rës rakah non, ko iu vahik non raoe, a ma tah poë varih hikta se te' ne.

A ö ihiho' pa te' sunön va'peh me a Sone' Sipsip to te' non pa vöön pamëh. Ka ma te' kikiu pe Sosoenën se kiu ne manih pe'. ⁴Ee se te' va'peh me ne pe', ko kute' e ne pa mataneah. Ke' kiun a ëhnaneah manih pa ma naire. ⁵Ka popoen hikta se te' hah non, kee hikta se iu hah ne o ëman va pa potan me o ram. Suk e Sosoenën, e Apuh se he' e non po ëman manih pa ma napan. Ka napan poë varih se te' va ne manih po te' susunön pa ma tamooan.

E Ieesu' Se Hah En Ma'

⁶Ka ankerö' soe ka neo' pan, “A ma soe varih to para' man, eöm a ma napan to se vaman rakah. E Sosoenën, e Apuh to vanö ma' a Tuvuh Vasio' pe' pa kunkuin o kokoman po te' vanënën soe, marën a vatvus a ma soe pe'. E' to vanö ma' a ankerö' pe' pa vataare a ma nap kiu pe' a ma tah kurus se tavus vëvëhö' ee. ⁷E Ieesu' to soe pan, “Pënton öm, eö' se nö vëvëhö' eo' ma' manih peöm. A ma napan to vavatet ne a soe pe Sosoenën to te' non komön o puk vëh, pa ma tah se tavus amot, a ma napan poë varih se vaeö.”

⁸Eö' e Jon, to tēnan ko ep a ma tah kurus varih, parö' vatokon havin mon a ankerö' vëh to vataare a neo' a ma tah varih pa vasunön eah. ⁹Ivëhkëk, e' to soe pan, “Eën se koe a nok va nën! Eö' a meh te' kikiu to te' va e no' pën, me a ma kea pën varih o te' vanënën soe, me a napan varih to vavatet ne a soe to te' non komön o puk vëh. Eën se vasunön varoe nom e Sosoenën a paeh”. ¹⁰E' to soe ka neo' pan, “A soe pe Sosoenën to te' non komön o puk vëh sën nat nom kooan nom. Suk o poen ne Sosoenën to iu nok non a ma tah poë varih to öök vatët en. ¹¹Ivëh, ka napan varih to nonok vatëh ne a ma taate' hat, ee se pah te' ne pa nok a ma taate' hat. Ka napan varih to nonok ne a taate' te'te'vaasi', e'e se pah te' ne nën. Ka napan varih to nonok ne a taate' vih, e'e se te' ne pa nok a taate' vih. Ka napan varih to te' ne pa taate' vivihan, ee se pah te' vivihan ne, pare nat ne nonok hah ne a taate' hat, suk ataeah, e Ieesu' se keh nö vëvëhö' en ma', ahik hah, ta tēem nee se panih a ma taate' hat pee.”

¹²E Ieesu' to soe pan, “Pënton öm, eö' se nö vëvëhö' ma', eö' se te' ma' o voen marën a he' papaeh a ma napan to onöt non a ma taate' nee to nok voh. ¹³Eö' varoe kuru a taneo pa ma moeh tah, ko se te' no' pa vahik pa ma moeh tah. Eö' a pusun in a ma tah kurus, parö' vavahik hah nö no' a ma tah nö' to nok voh.

¹⁴A ma napan varih to vaman voh e Ieesu' ko era' pe' pupui a ma ohop pee, ee se vaeö. Ee to onöt e ne pa kon a taëen manih po naon va

po to'to', me ee to onöt e ne pa ho manuh po hopa' va pa vöön. ¹⁵A ma nap orora' te', me a napan to te' ne pa taate' rëhrëh, me a nap ipip vamët te', me a napan varih to vasunön ne a tah nö'nës, me a nap pikpiuk, me a napan varih to te' ne pa taate' popoen, a ma napan kurus varih se te' tavus këh e ne pa vöön pe Sosoenën, a vöön Jerusalëm.

¹⁶Eö' e Ieesu', to vanö voh nös a ankerö' peö' manih peöm, ke' vatvus ka neöm a soe manih peöm o kum te' varih to vaman a no neo'. Eö' e koa', to tane' voh ma' po vute' pe Devit. Eö' a tovia' vëh, to ëman vamaaka no' sih pa pöstakah.

¹⁷A Tuvuh Vasio' me e köövo pa Sone' Sipsip to soe pan, 'Nö mah!' Ka ma napan to pënton a soe pamëh se soe pet ee pan, 'Nö mah!' Keteh to manoe ko iu kaak non, e' se nö ma' ko kaak, e' se kaak tane' pa rën to he' non o to'to' to te' va non manih po he' akuk pe Sosoenën.

¹⁸Eö' to he' a soe kikis manih pa napan varih to pënton a soe pe Sosoenën to te' non komön o puk vëh. Ta pah te' se keh vatom pet ta meh soe manih pa soe vëh, a ma tah hat vörep varih ne Sosoenën to sosoe non komön o puk vëh, e' se ununun ken pa te' pamëh. ¹⁹Ka te' se keh kon ke ta pah ö soe va pa soe pe Sosoenën to kiun non komön o puk vëh, e Sosoenën se kon këh en pe' pa taëen va po naon to he' non o to'to'. E' se hikta te' hop non pa vöön pe Sosoenën vëh no puk to vavahutët e non."

²⁰A te' vëh to vatvus a soe va pa ma tah kurus varih, e' to soe pan, "O pöh man rakah, eö' se nö vëvëhö' eo' ma'."

Oman! Apuh Ieesu', eën se nö rakah ma'.

²¹O ururuan pe Apuh e Ieesu' se te' va'peh me non a napan kurus pe Sosoenën. Oman!